

矣適有行人自謂知藥者謂喬公曰此白棘也公何  
謬哉仲烈愕然而疑亦曰吾怪其味甜今果如此喬  
公信是言乃譏余作采玉篇謂宋人不識玉而寶珉  
石也余心知必是猶以獨見之故被奪於眾人乃喟  
然而嘆曰嗟乎人之大明者目也心之至信者口也  
夫日照五色口分五味玄黃甘苦亦可斷而不惑矣  
而路傍一議二子增疑况君臣之間朋友之際乎自  
是而觀之則萬物之情可見也感采玉詠而作觀玉  
篇以荅之并示仲烈譏其失真

鷓夷雙白玉此玉有緇磷懸之千金價舉世莫知真

丹青非異色輕重有殊倫勿信玉工言徒悲荆國人

素絲

陸龜蒙

園客麗獨繭詩人吟五綵如何墨子淚反以悲途窮  
我意異於是願參天地功為綫補君衮為弦繫君桐  
左右脩闕職宮商還古風端然潔白心可與神明通

李都尉古劍

白居易

古劍寒黯黯鑄來幾千秋白光納日月紫氣排斗牛  
有客借一觀愛之不敢求湛然玉匣中秋水澄不流  
至寶有本性精剛無與儔可使寸寸折不能繞指柔  
願快直士心將斷佞臣頭不願報小怨夜半刺私讐

唐文粹 卷十八  
勸君慎所用無作神兵羞

廢琴

絲桐合爲琴中有太古聲古聲淡無味不稱今人情  
玉徽光彩滅朱弦塵土生廢棄來已久遺音尚泠泠  
不辭爲君彈縱彈人不聽何物使之然羌笛與秦箏

廢瑟詞

張籍

古瑟在匣誰復識玉柱顛倒朱絲黑千年曲譜不分  
明樂府無人傳正聲秋蟲暗穿塵作色腹中不辨工  
人名幾時天下復古樂此瑟還奏雲門曲

說劍

元稹

吾友有寶劍密之如密友我寶膠漆交中堂共杯酒  
酒酣肝膽露恨不眼前剖高唱荆卿歌亂擊相如缶  
更擊復更唱更酌亦更壽白虹座上飛青蛇匣中吼  
我聞音響異疑是干將偶爲君再拜言神物可見不  
君言亦可見復言我自取迎匣已焚香近鞘先澤手  
徐抽寸寸刃漸屈彎彎肘殺殺霜在鋒團團月臨鈕  
逡巡潛虯躍鬱律驚左右霆雷滿室光蛟龍繞身走  
我爲捧之泣此劍別來久鑄時董山破藏在松桂朽  
幽匣獄邊埋神人水心守本用稽泥淬果非雷煥有  
我欲評劍功願君良聽受劍可剗犀兕劍可切瓊玖

劍決天外雲劍衝日中斗劍隳妖蛇腹劍拂佞臣首  
太古初斷鼇武王親擊紂燕丹卷地圖陳平縮花綬  
曾被桂樹枝寒光射林藪曾經鑄農器利用翦稂莠  
神物終變化復為龍牝牡晉末武庫燒脫然排戶牖  
為欲掃羣胡散作彌天帚自茲失所往豪英共為詬  
今復誰人鑄挺然千載後既非古風胡無乃近鷓九  
自我與君遊平生益自負况擎寶劍出重以雄心扣  
此劍何太奇此心何太厚觀君慎所用所用無或苟  
潛將辟魍魅勿但防妾媢留斬泓下蛟莫試街中狗  
君今困泥滓我亦空塵垢俗耳驚大言逢人少開口

春桂問荅二首

王績

問春桂桃李正芬華年光隨處滿何事獨無花  
春桂荅春華詎能久風霜搖落時獨秀君知不

養鷲詞 并序

劉禹錫

途逢少年志在逐絕句方呼鷹隼以襲飛走因縱觀之  
卒無所獲行人有嘗從事於斯者曰夫鷲禽飢則為  
用今哺之過篤故然也予感之作養鷲詞

養鷲非玩形所資擊鮮力少年昧其理日日哺不息  
探鷲網黃口旦暮有餘食寧知下韝時翅重飛不得  
培隄止林表狡兔自南北飲啄既已盈安能勞羽翼

對菊

賈島

九日不出門十日見黃菊灼灼尚繁英美人無消息

直鈎吟

盧仝

初歲學釣魚自謂魚易得三十持釣竿一魚釣不得  
人鈎曲我鈎直哀哉我鈎又無食文王已沒不復生  
直鈎之道何時行

競渡

元稹

吾觀競舟子因測大競源天地昔將競蓬敷晝夜昏  
龍蛇相噴薄海岱俱崩奔羣動皆攪撓化作流渾渾  
數極關心息大和承混元一氣忽爲二蠢然畫乾坤

日月復照曜春秋遞寒溫八荒坦以曠萬物羅亦繁  
聖人中間立理世了煩延絲絲復幾歲逮及羲與軒  
炎皇熾如炭蚩尤扇其燔有熊競心起驅戰山林樊  
一戰波委燭再戰火燎原戰訖天下定號之爲軒轅  
自是豈無競瑣細不復言其次有龍競競渡龍之門  
龍門浚如瀉淙射不可援赤鱗化時至塘突鬢鬣掀  
乘風瞥然去萬里黃河翻接瞬電燧出微吟霹靂喧  
傍瞻曠宇宙俯瞰卑崑崙庶類咸在下九霄行易捫  
倏辭蛙黽穴遽排天帝闈廻悲暴鱣者未免鯨鯢吞  
帝命澤諸夏不棄蟲與昆隨時布膏露稱物施厚恩

草木霑我潤豚魚望我蕃嚮來同競輩豈料由我存  
壯哉龍競渡一競身獨尊捨此皆蟻鬪競舟何足論

冬日見牧牛人擔青草歸

張說

塞上絲應折江南草可結欲持梅嶺花遠競榆關雪  
日月無他照山川何頓別苟齊兩地心問天將安設

道州觀野火

呂溫

南風吹烈火焰焰燒楚澤陽景當晝連陰天半夜赤  
過處若彗掃來時如電激豈復辨蕭蘭焉得分玉石  
蟲蛇盡爍爛虎兕亦奔迫積穢一蕩除和氣始融液  
堯時旣敬授禹稼斯肇迹遍生合穎禾大秀兩歧麥

家有京坻詠人無溝壑感若悟焚如功來歲終受益

論寶二首

元稹

沉玉在弱泥泥弱玉易沉扶桑寒日薄不照萬丈心  
安得潛淵蚪拔壑超鄧林泥封泰山吐水散旱天霖  
洗此泥下玉照曜臺殿深刻爲傳國寶神器人不侵  
水置白玉壺始見清皎絜珠穿殷紅縷始見明洞澈  
鑄鄒無人淬兩刃幽壤鐵春鏡無人拭一片埋霧月  
驥跼環堵中骨附筋入節蚪蟠尺澤內魚貫蛙同穴  
餘艖無巨海浮桴矜濩滴棟梁無廣廈顛倒卧霜雪  
大鵬無長空舉翮受羈紲豫章無厚地危柢真飢餓

圭璧無卞和其與頑石列舜禹無陶堯名隨腐草滅  
神功伏神物神物神乃別人神不世出所以神功絕  
神物豈徒然用之有施設禹功九州理舜德天下悅  
璧充傳國璽圭用祈泰折千尋豫章榦九萬大鵬歇  
棟梁庇生民餘鯨濟來哲蚪騰旱天雨驥騁流電掣  
鏡懸姦膽露劔拂妖蛇裂珠生照乘光冰瑩環座熱  
此物比在泥斯言爲誰發凡今盡凡耳不爲君不說

送春曲三首

劉禹錫

春向晚春晚思悠哉風雲日已故花葉自相摧漠漠  
空中去何時天際來

春已暮冉冉如人老映葉見殘花連天是青草可憐  
桃與李從此同桑棗

春竟去此去何時迴遊人千萬恨落日高臺寂寞  
繁華盡流鶯歸不來

衡州早春二首

呂溫

碧木何逶迤東風吹沙草煙波千里曲不辨嵩陽道  
病肺不飲酒傷心不看花唯驚望鄉處猶自隔長沙

尋人偶題

邵真

日昃不復午落花難歸樹人生能幾何莫厭相逢遇

題花樹

楊衡

都無看花意偶到樹邊來可憐枝上色一一爲愁開

惜花

陸龜蒙

人壽期滿百花開唯一春其間風雨至旦夕旋爲塵  
若使花解愁愁於看花人

秋日

耿緯

返照入閭巷憂來與誰語古道無人行秋風動禾黍

秋夕懷遠

孟郊

卧冷無遠夢聽秋酸別情高枝低枝風千葉萬葉聲  
淺井不供飲瘦田長廢耕今交非古交貧語聞皆輕

蟋蟀詩

羅隱

頑颺斃芳吹愁夕長屑戍有動歌離帟夢如訴如言  
緒引虛寬周隙伺榻繁咽夤緣范睡蟬老冠峨綏好  
不冠不綏爾奚以悲蚊蚋有毒食人肌肉蒼蠅多端  
黑白偷安爾也出處物兮莫累壞舍啼哀虛堂泣曙  
勿徇諠譁鼠豈無牙勿學萋菲垣亦有耳危條槁飛  
抽恨咿咿別帳釭冷柔魂不定美人在何夜影流波  
與子佇立徘徊思多

秋思

司空圖

身病時亦危逢秋多慟哭風波一搖蕩天地幾翻覆  
孤螢出荒池落葉穿破屋勢利長草草何人訪幽獨

在郡秋懷二首

張九齡

三百六

秋風入前林蕭颯鳴寒枝寂寞遊子思寤歎何人知  
宦成名不立志在歲已馳五十而無聞古人深所疵  
平生去外飾直道如不羈未得操割效忽復寒暑移  
物情有固然身退毀亦隨悠悠滄江渚望望白雲涯  
露下霜且降澤中草披離蘭艾若不分安用馨香爲  
庭蕪生白露歲候感遐心策蹇慙遠塗巢枝思故林  
小人恐致寇終日如臨深魚鳥好自逸池籠安所欵  
掛冠東都門採蕨南山岑議道誠愧昔覽分還愜今  
撫然憂成老空爾白頭吟

唐文粹十八卷終



重校正唐文粹卷第十九之上

宋吳興姚 鉉纂

明建武鄧 漢校

頌甲 摠六首

盛德大業

無疆頌 李華

起義堂頌 僧一行又云

開元正曆握乾符頌 張說 上黨舊宮述聖頌

龍池聖德頌 張九齡 靈武受命宮頌 楊炎

無疆頌 并序 李華

臣華言伏以漢明帝時徼外蠻夷槃木白狼獻詩歌

國家圖書館, NATIONAL CENTRAL LIBRARY, TAIWAN, R.O.C.

德屬事史官况臣自曾祖至臣備國家職負臣又逮  
 事玄宗肅宗今以餘年獲事陛下官歷御史補闕尚  
 書郎命薄多病不獲奔赴闕庭恐先朝露同於泥塵  
 若無歌詩頌德曾蠻夷不若也敢述列聖為無疆頌  
 式昭皇家大慶無窮謹昧死稽首以聞

高祖元頌

昊昊旻天

監於下

興有德

維隋之杪

時黷陰凝

陽潛未登

人思照矣

雷行龍興

盪濯羣慝

文明乎萬國

垂仁蒸人

載親天監

保我子孫

巍巍皇皇

後之皇

丕承之

太宗烈頌

高祖受天命

誕興太宗

成天之命

帝煬昏逾

黎人毒痛

甚蕪于爐

甚溺于塗

以號以呼

呼天無辜

高祖謂太宗

爾必有天下

爾其訂謨

太宗稽首

恭受天命

臣請滌除

張我師

撫征四國

翦難羣慝

鼓一方

三方震驚

默昭其靈

隨顧而平 我負我乳 我安我成

以奉君父 以臨天下 任忠孝文武

建禮章樂舞 我雖明德 諫則納汝

時惟帝降佑之 自古明后 莫如我德

我勛唐無疆 天子之無疆 本太宗休命

高宗康頌

肇為址為堂 實勸實勛 付俾厥裔

丕承后 帝思不忘 神業靜康

不耀而光 不求而昌 自中方

外達夷羗 瞻我大邦 助祭在干廟

執貢朝于王 油油時雲 雨厥百穀

溇溇景風 扇彼嘉穀 飴口飽腹

以厭以足 俾壽而福 都阜成天人

中宗興頌

屏蠱之毒 豐而為螻 謀虐天之族

天祐聖祚 八柱將覆 帝告五臣

保翼朕躬 赫赫彤彤 日昇雲中

百臣受命 鉞爾頑兇 故曰再造我天下

生人鼓舞 既成矣 又奉父母

睿宗德頌

后戚之禍再興 有危兢兢 廟祧震怒

陰命聖子 翼登聖父 奮其神旅

宵杖金斧 殄穢逆亂 大聖照臨

元元宅心 歸祚于有功有德

於戲盛德

玄宗文頌

丕鑠玄宗之明 克孝克仁 允武允文

宣祖宗之光 垂于子孫 盛禮畢舉

大樂畢陳 百蠻來賓 元元阜殷

戎或不賓 遣師徂征 罔不頓顙

蹈于雷霆 在漢方昌 用刑慘酷

中都繫考 六萬餘人 使者案錄

誅千萬人 其後賢王 光武赫赫

誅沛賓客 以千以百 孝明稱賢

楚獄連年 坐死逮捕 以萬以千

猶曰漢祚甚長 越我祖宗 不忍用刑

至于玄宗 哀彼鈇鑕 降為鞭挾

誕告郡國 大為屋室 醫彼百疾

追懷登遐 止害禽畜 旁為陂池

養鱗介族 既濡既渥 昆蟲草木

享國五十年 寓縣晏然 逆臣犯天

天念蒸人 若曰寧我負耻 不忍人戰死

乃告元子 理兵朔鄙 西幸蜀都

命元子受圖 天下既定 父堯子舜

歸于國都 無不欣愉 無不涕濡

傳聖自願 升靈太微 嗚呼上聖

之道之純 不可度思

肅宗孝頌

穆穆孝慈 有如肅宗之誠 達于神祇

爰訓六師 震登北陸 陵陵雷馳

西戎南蠻 北狄東夷 咸舉其旂

佐皇之威 帝心如天 無噬無慾

福然丘岳 破裂崖谷 逆隸傾覆

朝社大復 屈于海之外服 以盥以濯

以舞以躍 帝在東宮 孝如文王

蒸蒸其心 天地知其孝 既收鎬洛

祀于陵廟 奉迎上聖 天日並照

有兇有孽 將噬將齧 我旂方設

則已顛蹶 如燁於雪 尊嚴而仁

仁覆而嚴 大臣小臣 莫不潔廉

躬勤百度 百度如其素

今上照頌

大邦之興 維天相之 曷興曷相

有德繼王 昔殷王 盤庚武丁

紹登殷明 矧我帝君 丕承天命

疊引其慶 生我皇聖 幼冲聖敬

寔左右肅宗 開國御戎 羣帥稟教

舉則成功 自西自東 如霆如風

蕩滌元兇 罔不率從 既登大位

於變時雍 人咸曰 上如太宗

延億兆斯年 地博天崇 罔不爾容

玄宗元孫 為玄宗烈文 肅宗元子

承肅宗孝理

起義堂頌 并序

僧一行 又云張說

堯以天下禪舜舜以天下禪禹禹將宅百揆摠萬國

一讓于稷尚再讓于臯繇稷尚先舉彼商與周以之

更盛臯繇後天我國家於茲受命非舜以考天而疇

咨審靈命之陰隲非禹以享天而德讓知歷數之有

歸及乎玄元間出光大前慶垂道德而統運依清虛

而立法天祚我李厥惟舊哉并州起義堂者皇天造

帝之初高祖誓衆之地也隋氏失御國亂無家小道自賢大才胥忌惟宮室陂池之好惟沈湎暴慢是保上帝不歆黎人咸戚六軍踰海而東敗萬乘過江而南覆豺狼入邑狹獠爭人黔首囂然方將無訴我高祖感之乃龍躍晉水鳳翔太原百神前驅萬姓來奔開咸陽入天門用湯武之兵靜新室之亂遵唐虞之典承太王之基率百官受終于文祖輯五玉班瑞于諸侯類圓禋方之禮備封功爵德之議允約法惟簡代虐以寬子惠困窮懷柔蠻貊金石一變日月重華近古以來未有革命易姓若此之盛者也非天私我

有唐惟天祐于積德非唐求于人庶惟人懷于累仁當此之時太宗內啓聖謀外行專斷躬探甲冑跋履山川駕英雄而爲奧主一區域而定大業周詩曰昊天有成命二后受之信今之謂也若夫脩德以降命奉命以造邦源濬者流長根深者葉茂天人報應豈相遠哉觀周之興始於后稷公劉承以大王王季皆勤儉忠厚克廣前烈至于文王成之武文啓之康王安之故卜世三十卜年八百天所命也我唐之興也始於皐繇玄元承以景皇元帝皆立言邁德垂裕後昆至於高祖受之太宗有之高宗守之中宗復舊業

睿宗新景命比之周室我何謝焉且如陳德明刑庶其躬稼之績玄宗道要小其避狄之仁化流率土狹其江漢之域義寧大朝羞其牧野之戰故武德中太行出太聲曰唐興理萬年蓋天之所命年代未可涯也仲尼曰惟天爲大惟堯則之又曰韶盡美矣又盡善也非至德其孰能如此其大者乎於戲先后捨元子而立予主鬯煩大位而付予天下自高祖創業百有六戰欽承丕緒十有四載東西南北無思不服山川鬼神亦莫不寧實惟藝祖儲福之所致豈予幼孫菲德之能及方將運心于玄妙之境勵志于造化之

爐發令爲祥行施惠爲霖雨任賢爲兩曜仗能爲四時昇溥天之下有形者遂全懷生者自足樹鋪野繭田種嘉穀斲雕爲璞捐珠棄玉追大庭而齊風慶華胥而同俗非曰能爾願憑宗祐而效焉癸亥之歲獻春正月濟河橫汾省方展義存問黎老緬慕本邦城郭巋然桑梓如舊覽風物之憂思尋王業之艱難惟高祖若天地之開闢化成萬類惟太宗若日月之照臨光于四表舉晉陽之甲除君側之盜由唐侯之封升天子之號肇基發迹實在於茲仙駕無所或顧懷于舊土靈魄無方儻來歸于北堂郡縣之所宜嚴奉



前人有言曰禮不忘本樂保其德如姬詠周原而劉  
歌沛邑思我烈祖如聞歎息之音嗟爾後人無忘成  
功之頌頌曰

皇矣上帝臨下有赫降監四海求人之瘼吁彼隋場  
其政不獲眷我高祖此惟其宅天輔臯繇明刑弼教  
道尊老氏同玄體妙仁表四孔明融獨照隨父託心  
史良辨貌高祖誕靈神光夜耀天妹作合日兄夢紹  
祚生文帝膺運會昌首唱高祖騫飛晉陽萬夫一心  
元戎啓行火旗炎炎雲鳥洋洋五星迓帝萬國謳唐  
天網恢疎王師節制威惟連戮老生摧斃山祇引軍

河龍渡帝渭倉散積離宮弛閉關輔來蘇遠方咸惠  
長安宮室上法太微隋遷寶鼎唐在璿璣仗入雙闕  
詔出九圍三靈協載百祿同歸帝謂太宗表正封略  
濤蕩颺掃霆馳電爍劔不摧鋒弩無再曠西平汧隴  
東取河洛杲密德充頭懸面縛北走獯鬻南達蠻荆  
遼碣作乂梁岐底平風動神行海隅蒼生莫不來庭  
於昭義堂誓衆資始天命所起于胥頌美維予小子  
夙夜敬止於戲皇王緒思不忘

開元正曆握乾符頌

并序

張說

客有嘲臣曰聖主正新曆握乾符百僚賡歌以美時

六合鼓舞以頌德先生獨宴默書閣含翰詞林奚其  
爲僥倖也臣應之曰斗水不能評巨壑之量隙光未  
足議大明之體何者見福而守隘也握乾符者不謂  
執天命歟執天命者非夫廣德休曆交相表裏況命  
者夫子之所罕言也焉可偏贊而撻握符之盛哉如  
作者略大本舉小節不亦仲尼之門所聽瑩也是以  
洵思乾慮乂難其述客無異焉客曰請終餘論粵若  
我大唐慶始白雲道昇紫氣屬漢東失馭淮南不返  
高祖舉晉陽之甲戡定關西太宗因徯后之師削平  
天下高宗收圖海外檢玉封中九域黎人重代飲澤

雖鳴鸞改號神龍中興周鼎歸唐玄圭祀夏中宗違  
代嬖孽窺國於是乎聖上起藩邸入鈞陳一麾水心  
羣兇泥首崇復大聖越踐少陽受禪當宁而光大前  
烈垂統拜壁而慎寧後嗣四海有覆盂之安百代無  
委裘之隙是之謂聖人握符之大寶也四星入輔五  
將出禦倚禮樂爲國計仗仁義爲軍勢英賢集殿而  
文教成干戚舞階而武功振敬讓光于九族孝慈行  
於萬宇磧嶂西南渤瀚東北熾皮火毳暍炎山污熱  
海向風來王黑貂駁駿浮天溟絕冰漠連歲獻款鳥  
獸無猜人之意草木無不達之氣升中于天比天同

貴是之謂聖人握符之大政也歷試上黨黃龍飛天  
入清中禁白虹指日瘞汾睢寶鼎見柴岱宗卿雲蔚  
非應事而呈瑞者雖多狎而不紀矣是之謂聖人握  
符之大祥也以數推氣以氣定朔以星殷時以閏成  
歲老星間而革踈度置歲差而辨誤日立大衍之紀  
參大渾之晷合鍾律之聲極鬼神之情是之謂聖人  
握符之大曆也若夫仁聖根於內菁華發於外祥兆  
秘於前謠識灼於後自然之理也彼洛下閎者漢太  
初時一巧曆耳其云後八百歲當差一日有聖人正  
之斯人必抑將露才揚術預證來聖有者舊之傳記

鍾史策之明文然至隋之開皇及麟德聖歷三家創  
法一引爲徵約之年代則隣近稽之圖錄則曖昧未  
有如新曆之昭昭者矣昔在唐虞之際以斗精受命  
者七神得四均間氣而生者又二十八人所謂三十  
五際者也禹以金德王故夏后之有天下也生數四  
百年契以水德王故殷人之有天下也成數六百年  
稷以木德王故周人之有天下也成數八百年伯益  
之命中天而堯族以火德乘之故漢室之有天下也  
生數再及二百年其間距王而興不能復大禹九州  
之跡及勝殘百年之命者皆五神之餘氣也臯繇降

德皇唐復興土精應王厚德載物生數五百成數千  
年命曆有歸此其大較修德增祚與天無窮轉笑之  
徒莫能究也緯以入元三百四歲爲德運七百六十  
歲爲代軌千五百二十歲爲天地出符四千五百六  
十歲爲七精返初天人相應合若符節自堯典命羲  
和修重黎之舊理顓頊之曆上元甲子千五百餘歲  
得孔聖而春秋之曆序暨開元十二年甲子凡三千  
四十歲遇聖上而大衍之曆興是時也土德入生數  
之元天命當出符之會信矣伏惟聖上聰明文思道  
德之具也豁達大度皇帝之體也藝摠六經漢光之

學也文通三變魏祖之才也緣情定制五禮之本也  
洞音度曲六樂之宗也神於弧矢黃軒之威也聖於  
翰墨蒼頡之妙也兄弟善友王季之心也子孫衆多  
周文之福也大寶以定天位大政以布廣德大祥以  
合靈符大曆以啓成命德位兼才臨照如此符命介  
福粲彰如彼所謂廣德休曆交相表裏之效也善曆  
者必推來運以自神興王者不俟往言以表聖設徵  
夫洛下閎之語也其不有容成之事乎且如特有命  
比於日孰是夏王之福也賴卜年衰其德豈謂周公  
之訓也故曰王者執天命在於俟天符致天符在於

順天德布天德在於保天位四者備矣然後陳其盛  
德告於神明捨此道也胡可語正天曆握乾符哉謏  
臣情學謝生玄造樂虞典之歌舜羨周詩之美文敢  
不敷信辭薦清樂獻上客之課託衆篇之後云爾  
維皇六葉於赫啓聖步玉斗握金鏡地維續天柱正  
山川授方雷雨施令清廟九祐堯門百慶郊稷尊祖  
擇昌定命德自我流藝從我修龜易八卦龍書九疇  
文含玉律字吐銀鈎鳴絲鶴舞調箭援愁集賢榜殿  
花萼名樓神用外表事行先兆萬目朝徹千心暗曉  
卿雲爛熳黃龍窈窕遊姑射神人胥登太山天下小  
飛祥定瑞均靈蠢類鞮譯窮天琛維盡地爍此金戟  
鑄爲農器匪直也然探玄索秘軸止輪運辰居星轉  
得一神凝吹萬情辨發歛潛合晦明幽闡階冀朝開  
宮槐夜卷正我長曆同符大衍天地清焉日月貞焉  
四時行焉萬物生焉窮神知化美功成焉金版玉牒  
遠頌聲焉

上黨舊宮述聖頌

并序

維開元十有一祀正月皇帝展義于河東挾右太行  
畱宴上黨整兵耀武入于太原設都建頌以崇王業  
南轅汾睢祈穀后土天清日朗神歆如荅三月庚午

飲至長安六軍解嚴四方和會邇觀法象遐詠德澤  
大虞巡之典修美漢祠之禮舉人心翕而一變神物  
效而無方於是邠王臣守禮寧王臣憲申王臣撫岐  
王臣範薛王臣業獻書於內開府儀同三司臣璟尚  
書臣駿臣象先臣頴御史大夫臣淮抗疏於外僉曰  
陛下受天曆數稽聖典謨道貫三靈仁育萬類掃陰  
沴而覩日開闢之功也尊文考而御天帝王之孝也  
天以陛下爲子人奉陛下爲君萬殊之福斯應畢臻  
三代之風頌聲咸作今潞人懷代邸詠泗亭採聖崖  
延立石將表潛龍之館勒啟聖之圖勤亦至矣陛下

推而不報其何以下塞衆望上對神休哉臣聞天之  
所啓人之忻戴必憑睿聖玄懿之德元命真符之紀  
功業見乎變德施加乎時德厚者施溥功玄者應速  
或階晦以彰或由難而昌蓋生其德之謂天授其時  
之謂命天有成命其可沒乎陛下昔居是州也紫雲  
在天神光照室白鹿來擾黃龍上昇隴出仙洞而神  
魚躍山開禪穴而靈鍾韻謠言合讖巨迹引途嘉李  
傍連祥著自起當此時也金石預變獄訟先歸政殷  
六府人重五教陶無窳器漁有讓泉神而化之人不  
知力昔龍負圖而大舜登狼銜鈎而后殷昌玄珪錫

於夏禹赤伏歸於漢光應運協符希代稱寶未有窮  
祥極瑞儼瓌異如今之至者矣若玄貺集而不彰  
則神心不悅鴻業成而不贊則祝告無聞是掩天休  
而蓋聖德也臣子之罪將何解焉願聽潞人以揚丕  
烈帝曰往者中宗違代國步微艱天祚我唐大命集  
于睿宗大聖真皇帝朕畏天將命不敢迨遑其乾符  
坤珍皆先聖之餘福朕何力之有焉然重違昆弟公  
卿之請抑以敬從無爲虛美重朕不德也羣臣遊聖  
蕩莫能名約乎舊史敢頌成績辭曰

帝德廣運乃聖乃神天祚聖兮唐惟舊邦其命惟新  
再受命兮帝初正人降居上黨天下往兮黃龍晝見  
攀天而上九五象兮帝適于野紫雲之下求必在今  
帝寢于堂變龍有光觀者駭兮天迹童謠木連著立  
摠神異兮空鍾化穴縞鹿赤魚何詭異兮上天無聲  
託類附形覺悟人兮聖皇齋栗在得戒失昭事神兮  
皤皤潞老樂我王道愛舊宮兮赫赫頌功與天比崇  
攄無窮兮

龍池聖德頌 并序

張九齡

臣聞昔者玄德升聞皇天眷命元聖有作上帝何言  
而必見意於休徵忘象於幽贊惟茲降鑒若曰專精

道周萬物者其魄尤功濟生人者其祥大粵若古始肇有君臣巢燧之前寂寥無紀書契之後炳煥可觀若乃鬼神睢盱品彙紛錯性命未正吉凶不定而太昊氏將通其德則河爲之出圖人食未粒鳥獸是茹時不耕稼器無耒耜而神農氏將教其本則天爲之雨粟蚩尤不道炎帝不制銅鐵鑄兵材狼橫厲而軒轅氏將禁其暴則天爲之降玄女洪水方割下民昏墊堯德莫能弭厥災舜功不能除其害而夏后氏將理其績則洛爲之出書自茲已降蓋三千歲矣其間木火更王雲物告符有若狼銜鈎魚躍舟素靈出黃

星見豈不以湯德有慙武善未盡漢道旣雜魏方亦偏唯以一至之應且爲興王之兆則未有天錫真符聖受休命遠與大禹相續超與上皇比崇如我國家之盛者焉惟龍池蓋天之所以祚聖即今上下居之舊里京師爽塏之地傍無寶澤中忽濫泉非常而靈液涓流無幾而神化寢廣榮光休氣若烟若雲所未曾有則此之出雖清可以鑑而深不見底鱗介瑰詭充滿其中時莫知其所然日徒見其有異中宗採識者之議壓王氣而來遊聖上處或躍之時出飛龍而合應臨淄始封也邱第在馬上黨歷試也靈符紹至



天其以是求命我唐國家丁寧有所底止其若茲也夫數有時而否至理也無代而亡固存乎大聖之生也乘運而作鼓天下之動安天下之危故獎順成功自古之啓佑之也如彼克定多難自天之叶贊之也如此初中宗違代后黨窺隙大盜狃於得志羣慝起而擅朝若綴旒旒然當此時也天與若不取鬼謀若不協則我祖宗之業無乃將墜而億兆之命亦猶倒懸聖上感之提劍而起雷霆一奮妖沴以清內難旣衰外虞有謚推戴太上照臨萬邦實天之爲與人更始系皇統維乾綱決綻補壞蕩瑕滌穢而乃闕典咸

備舊章悉舉處窮盡達在困必通品物資以再生寰區爲之一變然後反華僞於朴還澆醜於醇以大道爲源以至仁爲根動推是心以御於事人見德而興行神享誠而介福故不任於刑罰亦不在於禱請大造化成玄猷充塞有如陽春播澤觸類皆滋泰山起雲無遠不徧雖昆蟲草木與蠻貊要荒樂其所生安其所習在牛羊而勿踐有干戈而載戢又況於衣冠華夏禮樂邦家而不形於斯須不彰於漸漬者也夫然何教非德何化非經何能事之不舉何醇精之未極周溥洋溢成乎緝熙至於太和莫不允若體包天

地之大事出皇王之表豈擎蹠曲拳盡禮極力將用  
彥聖不啻其口所能稱誦於吾君所可殆庶於至德  
且往者之有開也天感精以降聖聖敬命以奉天此  
誠有元則欽明文思及茲報本必嚴祇齋栗靈慶以  
屬之神化以荅之與初相明其微乃著紛綸先兆非  
篤信歟由是言之統天者人合符者聖而美德序命  
殊尤卓絕豈多乎哉至于古之興王必有所感五帝  
更尚五運傍通土者黃中之精於金爲母水者善利  
之物於土爲妃苟應期而有來必合德而爲表是則  
然矣天其或者亦阜育羣化發揮蕃祉始告以聖有

明徵終成乎帝之神冊因其立象之本會以相乘之  
數則載祀六百歷紀千年變而通之胡可量也宗子  
宗正卿裒信郡王璨若干人伯父伯兄仲叔季弟聚  
族相與詣闕上言天意昭著固已久矣人事符合亦  
云至矣而一德是建太階旣平靈臺靈沼赫赫明明  
天之爲大雖莫能名王之在鎬豈無頌聲上初克讓  
抑而未許至於累請乃曰俞哉史臣不敏敢獻頌曰  
茫茫元昊載凝載薄在帝庖羲繼天而作浩浩洪水  
包山襄陵舜亦命禹夏氏以興龍圖龜書二主是膺  
湯武已下夫何足徵右元命於爍巨唐秉運而起續禹

之統系堯之紀五聖在天不命曾孫高視河洛同符  
混元亦有黃龍出於靈沼明明穆穆天子之表右聖德

倬彼東井昭章于天沈精降液下為靈泉泉靈有泚  
有深無底泌之洋洋其甘如醴清德之鑑柔道之體

洪源濬規實天所啓右龍泉濯濯靈泉洞冥皇祗滋液  
流行化為神池曰止曰行惟聖之作匪鱸匪鮪惟龍

之躍植物斯生動物斯樂天根有見曾是不涸右神池  
靈有休氣紛紛郁郁如山之苞如雲之族潛龍在下

瞻烏在屋兆云其吉周爰咨詢既契我龜又叶我人  
鎬雖舊京其命惟新右休氣蜿蜿黃龍神池自出靈化

惚恍噴雲沃日告帝之符其儀孔佶或潛于泉或見  
在田與時順動亦應于天克酬我皇無得稱焉

靈武受命宮頌

并序

楊炎

臣聞享天降命惟德也戡難奉時惟聖也必有非常  
之運是興撥亂之功君以蒼生為憂不以濡足為患  
以寧濟為業不以修身為道此陶唐所以捨而不畏  
舜禹所以受而不疑靈武宮皇帝躍龍之所日者奸  
臣竊命四海蕩波我聖皇天帝探命曆之數啓龍圖  
作受命之書付于我皇帝皇帝方遊崆峒以求至道  
於是羣公卿士負玉旒金璽望氣芒碭之野三進於

閻闔之中曰臣聞在昔蚩尤連禍大盜中國神農氏  
兵莫能勝天降玄女勅軒轅氏大定其災厥後堯有  
九州之害而命禹禹以四海之功而受舜陛下主鬯  
大位十有九年精爽者皆美德馨乾坤也必聞幽贊  
玄德上達景福有歸六聖覩命曆之期兆人有臨難  
之請陛下畏災運而不處棄黎元而不顧以至仁爲  
薄以大寶爲輕臣等若不克所請與億兆之衆將被  
髮拊膺號於天而訴於帝矣皇帝唯然改容曰豈人  
心歟丁卯廣平王倣大尉光弼司徒子儀尚書左僕  
射冕兵部尚書輔國與北軍將士西土耆老萬五千

人排闥以訴帝曰豺狼穴居宮闕陛下兆庶爲餌  
宗廟爲墟若臣等誠懇未通是高祖不歆於太廟且  
陛下涉渭則洪流涸迴鑿則慶雲見布澤而川池廣  
勤道而嘉禾生靈祇髣髴玄貺幽感臣聞符命待聖  
而作天運否終而會歲糝昉嚮會也曆武英明聖也  
臣等敢昧死上聞帝乃灑齋宮啓金匱嗚咽拜受詔  
有司大赦天下改元曰至德元年尊聖父爲文武太  
皇帝是日烟雲變作土庶踴躍黃龍見於東郊紫氣  
滿於天門翌日也數百里衣裳會兼旬也數千里朝  
貢會踰月也天下兵車會浹時也四方戎狄會以一

旅成百萬之師率胡夷平社稷之難禮郊祀戴聖皇  
與人合誠心以氣消天厲動罔不吉歆無不報是以  
白鹿擾於王庭靈芝產於延英化動而功成淵默而  
頌聲言禪代者陋蒼梧易姓之名語嗣守者羞唐堯  
積善之辱述戡定者歎四紀而復夏美中興者蚩三  
六而滅新於戲神祇之所歸往品物之所法象鼓飛  
龍於尺水仗大義而東向矢謨發號實在茲都願篆  
石宮庭以垂萬古俾過山澤知風雨之奧窮造化識  
天地之鑪臣炎稽首敢獻頌曰

赫赫河圖啓天之祐雲從億萬皇在九五惟昔陶唐  
克傳舜禹濩也武也夫何足數彼妖者勃惟暴惟貪  
天實卽命人將不堪皇曰內禪于再于三盡武之善  
去湯之慙兵車百萬洶洶雷震橫會九州爲行爲陣  
恃力者踣從命者順孝以奉天神而撫運至德唐堯  
崇功大禹皤皤比叟垂白而覩沛邑空歌周原已古  
徘徊頌聲未介茲土

重校正唐文粹卷第十九之上

終

重校正唐文粹卷第十九之下

宋吳興姚 鉉纂

明建武鄧 漢校

頌乙 摠三首

封禪

紀泰山銘

附 玄宗御製

大唐封禪頌

張說

大唐封東嶽朝覲壇頌

蘇頌

紀泰山銘

附

玄宗御製

朕宅帝位十有四載顧惟不德慙於至道任夫難任  
安夫難安茲朕未知獲戾於上下心之浩蕩若涉於



大川賴上帝垂休先后儲慶宰衡庶尹交修皇極四海會同五典敷暢歲云再熟人用大和百辟僉謀唱予封禪謂孝莫大於嚴父謂禮莫尊於告天天符既至人望共積固請不已固辭不獲予與夫二三臣稽虞典繹漢制張皇六師震疊九寓旌旅有列士馬無譁肅肅邕邕翼翼溶溶以至于岱宗頂也爾雅云泰山爲東嶽周官曰兗州之鎮山實惟天帝之孫羣靈之府其方處萬物之始故稱岱焉其位居五岳之伯故稱宗焉曰昔者受命易姓於是乎啓天地薦成功序圖錄紀氏號朕承先王茲率厥典實欲報玄天之

眷命爲蒼生之祈福豈敢高視萬古自比九皇哉故設壇場於山下受羣方之助祭躬封燎於山上奠一獻之通神斯亦因高崇天就廣增地之義也乃仲冬庚寅有事東岳類于昊天上帝配我高祖在天之神罔不畢降粵翌日禪於社首侑我聖考祀於皇祗在地之神罔不咸舉暨壬辰覲羣后上公進曰天子膺天符納介福羣臣拜手稽首稱千萬歲慶答歡同陳誠以德大渾叶度彝倫攸叙三事百揆時乃之功萬物由庚兆人允植列牧衆宰時乃之功一二兄弟篤以孝友錫類萬國時惟休哉我儒制禮我史作樂天

地擾順時惟休哉蠻夷戎狄重譯來貢累聖之化朕何慕焉五靈百寶日來月集會昌之運朕何感焉凡今而後傲乃在位一王度齊衆法權舊章補缺政存簡易去煩苛思立人極乃見天則於戲天生蒸人惟后時又能以美利利天下事天明矣坤厚載物惟后時相能以厚生生萬人事地察矣天地明察鬼神著矣惟我藝祖文考精爽在天其曰懿子幼孫克享上帝時若馨香其丕乃曰會我之文武曾孫其誕錫新命續我舊業未保天祿子孫其承之予小子敢對揚上帝之休命則亦與百執事尚綏兆人將多于前功

而忘彼後患一夫不獲萬方其罪予一心有終上天其知我朕惟寶行三德曰慈儉讓慈者覆無疆之言儉者崇將來之訓自滿者人損自謙者天益苟如是貞軌迹易循基構易守磨石壁刻金記後之人聽詞而見心觀末而知本銘曰

惟天生人立君以理惟君受命奉爲天子代去不留人來無已德涼者滅道高斯起赫赫高祖明明太宗爰革隋政奄有萬邦罄天張宇盡地開封武稱有截文表時邕高宗稽古德施周溥茫茫九夷削平一鼓禮備封禪功齊舜禹巖巖岱宗衍我玄神中宗紹運



舊邦惟新睿宗繼明天下歸仁恭已南向網緼化醇  
告成之禮留諸人人緬予小子重基五聖匪功伐高  
匪德矜盛欽若祀典丕承永命至誠動天福我萬姓  
古封泰山七十二君或禪社首或禪云云其迹不見  
其名可聞祇適文祖光昭舊勳方士虛誕儒書齷齪  
佚后求仙誣神檢玉秦災風雨漢汗編錄德未合天  
或承之辱道在觀政名非從欲銘心絕巖播告羣岳

大唐封禪頌

張說

皇唐六葉開元神武皇帝再受命致太平乃封岱宗  
禪社首鑿石紀號天文煥發儒臣志美立碣祠壇曰

厥初生人俶有君臣其道茫昧其風朴略因時而欵  
起與運而紛落泯泯沒沒無聞焉爾後代聖人取法  
象立名位衣裳以等之甲兵以怛之於是禮樂出而  
書記存矣及其源致敬乎天地報其本致美乎鬼神  
則封禪者帝王受天命告成功之爲也閱曩聖之奧  
訓考列辟之通術疇若天而不成曷背道而靡失由  
此推之封禪之義有三帝王之略有七七者何傳不  
云道德仁義禮智信乎順之稱聖哲逆之號狂悖三  
者一位當五行圖錄之序二時會四海昇平之運三  
德具欽明玄思之美是謂與天合符名不死矣有一

不足而云封禪人且未許其如天何言舊史者君莫道於陶唐虞舜臣莫德於臯陶稷尚三臣降德皆有天下仲尼叙帝王之書繫周秦之誓明魯祀周公用王禮秦承伯益接周統孔聖微旨不其效歟然秦定天下之功高享天祿之日淺天而未忘庭堅之德也故大命復集于皇家天之贊唐不惟舊矣其興之也玄靈啓迪黃祗顧懷應歸運以義舉撫來蘇以利見護也無放夏之慙武也無伐殷之戰高祖創業四宗重光德有格天漏泉蒸雲濡露菌蠢滋育氤氳涵煦若天地之覆載日月之照臨溥有形而歸景罄無外

而宅心百有八年于茲矣皇帝攘內難而啓新命戴睿宗而續舊服宇宙更闢朝廷始位蓋羲軒氏之造皇圖也九族敦序百姓昭明萬邦咸和黎人於變立土圭以步曆革銅渾以正天蓋唐虞氏之張帝道也天地四時六官著禮井田三壤五圻成賦廣九廟以尊祖定六律以和神蓋三代之設王制也武緯之文經之聖謩之神化之然猶戰戰兢兢日慎一日納規誨以進德遂忠良以代工講習乎無爲之書討論乎集賢之殿寵勇爵貴經明翼乎鸞鸞之列在庭毅乎貔豹之師居鄙人和旁感神寶沓至乾符坤珍千品

萬類超圖溢牒未始聞記我后以人瑞爲心不以物瑞爲意王公卿士儼然進曰休哉陛下孝至于天政合乎道前年祈后土人獲大穰間歲祀圓丘日不奄朔感祥以祈聖因事以觀天天文交合其則不遠意者喬丘埽路望翠華之來上帝儲恩俟蒼璧之禮久矣焉可專讓而廢舊勛羣臣固言勤帝知罪至于再至于三帝乃挹之曰欽崇天道俯率嘉話恐德不類敢憚于勤其撰巡狩之儀求封禪之故旣而禮官不戒而備軍政不謀而輯天姥練日雨師灑道六甲按隊八陣警蹕孟冬仲旬乘輿乃出千旗雲引萬戟林

行霍濩燐爛飛焰揚精原野爲之震動草木爲之風生歷郡縣省謠俗問百年舉百祀興墜典葺闕政攸徂之人室家相慶萬方縱觀千里如堵城邑連歡丘陵聚舞其中垂白之老樂過以泣不圖蒿里之魂復見乾封之事堯雲往舜日還神華靈鬱爛熳乎穹壤之間是月來至于岱祗祓齋宮滌濯靜室凝神玄覽將款太一議夫泰山者聖帝受天官之宮天孫摠人靈之府自昔立國莫知萬數克升中而建號惟七十而有五我高宗六之而今七矣非夫尊位盛時明德曠代遼闊難并之甚哉先時將臻夫大封也累封疆

於高岡築泰壇於陽趾夫其天壇三襲辰陞十二咸  
秩衆靈列坐有次崇牙樹羽管磬鏞鼓宮懸於重壇  
之內干戚釁矣鈎戟戣戮周位於四門之外伐國重  
器傳代絕瑞旅之於中庭玉輦金轂翠冒黃屋夾之  
於端路庶官百辟羗夷蠻貊褻成之後讓王之容序  
立於禮神之場髦頭弩牙鐵馬金鏃介冑如雪旗幟  
如火遠帀於清禁之野於是乎以天正上元法駕徐  
進屯千乘於平路留羣臣於谷口皇帝御六龍陟萬  
仞獨與一二元老執事之人出天門臨日觀次沆瀣  
宿曉曦赤霄可接白雲在下庚寅祀高祖於上封以

配上帝命衆官於下位以享衆神皇帝冕裘登壇奠  
獻俯僂叶金奏佾羽舞撞黃鐘歌大呂開闡闔與天  
語清將信公奉斗布度懋建皇極勤恤蒼生昭嘏乎  
未兆禳災乎未萌上下傳節而禮成樂遍福壽同歸  
而帝賜神策乃檢玉牒於中頂揚柴燎於高天庶忠  
誠之上達若憑焔而駕煙日轡方旋神心餘眷五色  
雲起拂馬以隨人萬歲山呼從天而至地越翌日尊  
睿宗侑地祇而禮社首遂張大樂觀東后國風惟舊  
無黜幽削爵之誅王澤惟新有青災大賚之慶不浹  
日至化洽於人心不崇朝景福遍於天下然後藏金

匱於拓室廻玉鸞於上都煌煌乎真聖朝之能事而高代之盛節者也于斯之時華戎殊俗異音同歎曰兵合多兩山峻多雲豈有大舉百萬之師尅期千里之外及行事之日則天無點翳地無纖塵嚴冬變爲韶景寒風鬱爲和氣非至德其孰能動天如此其順者乎昔人云自西自東自南自北無思不服今信知聖人作而萬物覩其心服之之謂矣或曰祭泰折主先后非禮歟曰是禮也非宜也王者父事天母事地侑神崇孝無嫌可也且夫柴瘞外事帝王主之蒸嘗內事后妃助之是開元正人倫革弊禮起百王之法也故令千載載末光聆絕韻咀其實漱芳潤爍玄妙之至精流不已之淑聲臣說作頌告于神明四皇墳而六帝典雖吉甫亦莫能名徒採彼輿人之詩曰大矣哉維天爲大惟皇則之率我萬國受天之祺子孫百代人神共保綏之云爾而已矣

大唐封東嶽朝覲頌

并序

蘇頌

封祀之山五在中國泰嶽首之昊穹之命再集巨唐皇帝受之臨位十四年考虞氏歲巡之義諷周王時邁之什十月辛酉步自有洛十一月景戌帳殿齋於岳趾淵默以清繹思而照將紀功布度順斗承天精

享也已丑宏觀軼區宇盛儀振開闢高臨建鳳萬隊  
張皇以燭山上御飛龍百神翕習以扶道國台二藩  
后四髦士密侍信臣高位扈封臺列升陛不下五十  
以聖言冲邈瑤牒寶書誓之旨曰朕獲守丕業恐不  
克駿命惟上帝儲休錫蒼生無疆之慶朕之慶也古  
則秘之何哉屬寒馳迅飈露清終夕若掃若鋤晏然  
而已庚寅天官次錄王制協時嚴高祖以配之嗣高  
宗以陟之冕裘立珪璧序潔壘俎調鍾呂倨勾於篋  
簾戛擊乎祝故寶駢瑞兮物焜煌空薄霄兮音容與  
則纖塵不動和氣充塞日在於觀天爲之門揚日大

光謂小天下昭以抱戴見之卿霽郁郁紛紛喜氣烟  
煇當芝檢引紫熏太紫洞而三辰接鬱蒼搖而萬歲  
聞白下達上逖吾君君之來兮望如雲端兮睟聖之  
門至尊辛卯有事于社首以泰折如泰壇於穆我睿  
宗佑而作主奠獻嗚咽天子之孝也僉以金匱歸勛  
於祖禰石礲藏美於乾坤戒咸秩則司存癸巳載大  
旂台大樂三陔嶠以惟抗四亞鏘而輅止朝羣牧揆  
千官底邦嶠數庭實華蟲辨等車馬來觀周人隨人  
二王之賓戎狄蠻貊萬里重譯必拱于著執贄奉璋  
顛顛昂昂靡敢怠遑乃建雞竿伐鼉鼓帝命出皇恩

溥揚異風作解雨施舍之蕩滌之宥法罪除頽頽頽  
湧洋溢周流黜黜不崇朝而遍者與此山俱疇翳而  
不拔胡微而不鋪也亦旣稱壽申命宗伯咨爾頽馬  
效古之刻石臣頽稽首再拜而言曰臣聞昔在帝堯  
臣惟咎繇聰明之謂聖邁種之謂德天若曰依于巨  
唐易姓者李王於中華崇功者唐聖之澤德之浸也  
我唐祚之興昌符誕膺兩儀動六葉承皇帝宣高祖  
四宗之景烈肇開元神武之明號廣矣大矣莫有不  
寧罔有不俾咸一德之輔不二心之臣羣后抗詞曰  
臣聞先王因天事天因地事地因名山升中于天陞

下得天之經得地之義得人之行行也者孝莫大焉  
兼三才以爲政政也者仁莫大焉含萬物以爲性今  
三才貞萬物享六典平九功成官不滔獄不放至于  
刑清良有以也因斯而談清明在躬志氣如神之睿  
者君也四國于藩四方于宣之美者臣也有物有則  
我君臣保人之原所由於前設其教於後亦往歲邦  
危中否天討內難陛下提三尺之劍旌閭闔絕勾陳  
趨北軍正北辰然後翼翼乾乾尊尊親親立我蒸人  
聖考所以付天下之公器蹈汾陽之清塵唐雖舊邦  
其命惟新古者振兵釋旅祠土祈穀先事也我是以

幸太原祭汾睢耀金甲肅邊鄙虜馬驚而不敢南向  
解嚴京師獲寶鼎獻宗廟戍人歸而盡務東作報福  
京坻於是乎爰佐五時郊天以奉時爰崇九室禘祖  
而敬思昭格遲遲神人允釐無何籍三脊盛六穗不  
召斯至擁休之類如山則委曷月而祕豈非享物降  
嘉司火也立渾同度在璿也陛下姑謂之薄臣所未  
諭且管氏詭齊帝王凡八十九湮淪鬱沒孰若致美  
我高宗勒岱甲子正六十昫蠻歲蕤故能應期我神  
武惟繼代奉業增高保鴻缺乎中何也即先后以權  
斲阻于運二宗紹復未遑厥功神闇之契不在諸子

而當聖躬固不可辭者審矣帝曰俞畏德之不稱而  
左輔右弼雜摺紳鴻碩之倫抱絕懷書蒸雲吐霧方  
集賢內殿講議前席以論之傳不云乎君子勤禮敬  
之至也易不云乎先王作樂豫以動也慎矣哉禮樂  
之爲用故執禮者具刪弊則質宜之自我變樂者理  
去商何害謙以爲臣二者洽而三讓之制曰可始嚴  
鹵簿騰七萃啓禁關迴九重以聽平鸞聲之雍雍匪  
疾匪徐物有其容動植讚華夷觀駢闐總搏羨漫半  
散出成臯踰滎波憑滑臺眺洪河遂並昆吾之墟倘  
佯乎大舜之澤瀕四瀆二濟入于兗徑九一二齊喬



於岱惟二旬有六而頓行在莫不皤皤華皓如藿傾  
陽或牽以餼或捧之觴偃僂乎康莊一以伸神武之  
今日一以感乾封之舊章迺餼歸之觴舉之慈且惠  
而與之驩沸涓頡頏知國鄒魯家洙泗乘汶野而圖  
記可知指泮林而頌聲不墜以周公之故將孔子之  
後翹然希王者之屬車聖人之清蹕則久及信宿之  
應巖巖所瞻宗神曰天齊王加一等於三事戶二十  
供王祀環十里禁人樵報也大禋旅之數重裊成之  
祿撫遺甿賜之復帝曰吁夫艱難繫王業休咎牽人  
事況天監之殊祥也殊典也不自滿而虔鞏于位朕

寶臣曰乾曜洎說有初有終時乃風欽哉汝作朕左  
右丞相繫汝忠益以嘉猷補袞之闕罔或怠遂弘天  
封煥天章篆介丘而旋德陽大饗乎羣方程後代美  
其律聲其實墳作四而籍言七也臣頽不敏繼伯夷  
之直清徵太史之留滯聆金奏同百獸之舞振木鐸  
採萬人之詩敢陳詩以頌曰

天子聖兮天孫崇登以封兮報以功受命再惟皇代  
天之賚人所載士馬山嶭戈矛山沓禎符山雜靈響  
山峇天與人合我鋪衍兮長粹清大元冊兮太一精  
休光光我之慶成舜四朝而禹萬國莫之我京

唐文粹

卷十九

重校正唐文粹卷第十九之下終

國家圖書館, NATIONAL CENTRAL LIBRARY, TAIWAN, R.O.C.

重校正唐文粹卷第二十

頌丙 雅賦摠八首

宋吳興姚 鉉纂  
明建武鄧 漢校

神武四

大唐中興頌 元吉

鳳翔出師紀聖功頌 揚炎

大唐河西平胡頌

平淮西雅 附柳宗元

時政一

聖政紀頌 來鵠

豐年一

國家圖書館, NATIONAL CENTRAL LIBRARY, TAIWAN, R.O.C.

德勝頌 歐陽詹

祥應一

歲星居心頌 權德輿

高世一

伯夷頌 韓愈

大唐中興頌 并序

元結

天寶十四年安祿山陷洛陽明年陷長安天子幸蜀  
太子即位於靈武明年皇帝移軍鳳翔其年復兩京  
上皇還京師於戲前代帝王有盛德大業者必見于  
歌頌若令歌頌大業刻之金石非老於文學其誰宜

為頌曰

噫嘻前朝孽臣姦驕為昏為妖邊將騁兵毒亂國經  
羣生失寧大駕南巡百僚竄身奉賊稱臣天將昌唐  
繫睨我皇匹馬北方獨立一呼千麾萬旗戎卒前驅  
我師其東儲皇撫戎蕩攘羣寇復服指期會不踰時  
有國無之事有至難宗廟再安二聖重歡地闢天開  
蠲除妖災瑞慶大來亮徒逆儔涵濡天休死生堪羞  
功勞位尊忠烈名存澤流子孫盛德之興山高日昇  
萬福是膺能令大君聲容云云不在斯文湘江東西  
中直浯溪石崖天齊可磨可鐫刊此頌焉何千萬年

鳳翔出師紀聖功頌

并序

楊炎

舜有兩階之舞周有孟津之會皇帝有岐陽之蒐德莫勤乎安國勛莫配乎立極利萬物莫近乎去暴蓋受天元符與人請命冥契相合億兆有歸以唱則感神鬼之心以征則去雲雷之難維唐七葉姦臣大盜於二京皇帝龍鳴於河北觀兵雍上建都發號以朝萬國心嚮天地志通幽昧淳精四達大造玄成於是巢山駕海之羣狼燾鳥章之君不期而趨于闕下者四十有三萬元帥廣平王俶大尉光弼司徒子儀等稽首言曰臣聞天啓聖以俟時聖感時而赴難非神

功不能當大運非玄德不能合人心故軒轅之道也伏蚩尤宗周之仁也稱襁負陛下之德大瑞於人和人和而動天天與和合氣百姓因之以獨化四夷因之以子來王師得之以貞勝意者河洛徯怨後東征之期人靈駿奔望西狩之禮天子方齊寶輅講金匱之書翌日霓旌武賁大車之輪黃鉞靈鼉彤弓太阿荆韓楚魏之廣七閩五獠之長金鼓百萬車徒九合大陣于東郊皇帝建白麾以誓于軍曰維高祖歆于上天四宗重光照臨下土百有五十祀至于聖皇摠武之于戈備文之法象叢爾逆虜敢迷天紀盜我符

璽贖我威靈使四海之內兵革縱橫肝腦塗裂旻蒼  
降鑿錫命於予俾績夏已墜之功寬堯未刑之族於  
戲余匪玉帛山河是愛惟蒼生災害是憂匪天命威  
力是憑惟人心忠義是保咨爾張目成天羅植髮成  
干櫓布和成將帥厲氣成風雲若作進退爾惟旗鼓  
若斷首尾爾惟常蛇若戮鯨鯢爾惟干將若拯沈溺  
爾惟巨艦真有一旅之衆武有十人之暮志定金石  
信非盟誓爾其念哉是時天威動六合兵氣連太白  
乾坤爲之塊軋河嶽爲之震蕩彼狐鳴鑿齒之徒不  
崇朝而聲反於謳歌形歸於蹈舞者幾過半矣故鄆

杜之師以形勝灞上之克以威逐桃林之陣以竒破  
河洛之孽以氣摧帝乃開天牢廻豹尾陵顛氣鎖攬  
搶應龍秉鉞玄女侍坐乃考夏氏配天之義備漢皇  
建武之典雲髦玉輅山動地踊降自西雍幸于京師  
萬姓前導百靈爲衛布德澤望陵寢悲黍稷之將秀  
覽城闕之爲墟以雷雨洗川澤以皇風清怨怒以大  
賞議勤勞以成功告宗廟以詳明去聾昧以惠政哀  
困窮清蹕而奉聖皇稱觴以朝前殿於是東國耆老  
長安士庶排御輅入天庭動千門呼萬歲煙雲下遶  
林藪山廻神靈頌於堂精鬼感於廟王侯慶於國父

子洽於家鍾石反於懸壘俎陳於席華戎踊躍喜氣  
磅礴日非三舍天聲萬里神謀不得窺其奧天道不  
能後其時斯一會之略也然後動變化爲鑪假仁義  
爲途陶氣象鑿耳目與神合司契以道浸澆醜全屏  
象之形斷珠玉之脛然後以景星燭夜甘露清氣昇  
閨風對天老捨鴻名以還太素乘大曆而統人紀俾  
不思而降不祭而歆以元和感生淳古於是宰臣聚  
而言曰主上以神武清難至德遂人崇勛絕瑞光照  
萬古闢開日月于今六年百姓豈忘力於帝乎人臣  
盍謝生於天乎請相與鑿石於誓師之場告成於得  
衆之地斯王道之盛典臣炎稽首敢獻頌曰  
天命帝兮蕩妖昏交風雨兮會秦門惟聖德兮漫海  
外五單于兮勇士會俗鳥獸兮家雲島越浮山泛青  
草徵羽翳兮列天營啓金滕兮賜長纓日爲車兮雷  
爲鼓醢鯨鯢兮掃煙雨開明堂兮饗文祖帝爲皇兮  
后爲母歌雲臺兮冊玉府篆穿石兮駕終古

大唐河西平胡聖德頌

并序

維唐至德二年春正月武威郡胡泊九蕃夷落內伺  
師旅之間外合狼豕之兇據金城害州伯蛇變交戟  
之下炎焚大澤之中二月乙丑皇帝以五命之服詔

太僕崔備摠中權專上將誓軍前之士卻城下之盟  
又命內常侍劉日新振鼓鐸之音護羌戎之長林竦  
蝟合會于東郊粵庚午高牙大旆鐵馬長緞歎以清  
笳陣以雲蛇列于四衝蓬頭執戟鼓以靈鼉進于遠  
路趨悍獷狻虎裘蟻臂比陵于土門之隊鈎車雲梯  
强弩堅楯齊傳于西烽之亭於是引熊虎之師杖龍  
蛇之劔矛戟四起煙塵火色金鼓一振天地徘徊血  
亂玄黃聲囂瓦屋是風雲皆入陣彼草木盡爲兵日  
月垂照於窮鄉皇靈赫臨於天外名王貴馬大玉文  
貝素女錦衣百金之產萬井之資皆委于入貢之府

布于有地之宮是時也千人踊萬人賀美太階之符  
見頌偃伯之議興特進金城太守李萬頃洎五邑長  
吏軍正大夫等言曰蓋聞王命先天以奉時賢臣合  
統以偕運靡乘乎帝籙不能撥亂罔應乎閒氣不得  
遭逢故大人之作必先靖難以摧兇取暴爲治國以  
任賢杖能爲建功磅礴乎茅茨之下歲蕤乎玄古之  
上斯軒轅得之以勝蚩尤大夏得之以勝有扈西伯  
得之去殷伐崇太宗得之奄有遼海上皇得之克乎  
巨猾陛下得之甬清宇宙掃蕩氛蠻允若大唐之新  
命復高祖之天下臣等恭惟六聖騰光百有五十祀



周賁海寓鋪敷菌蠢丹穴之費孤竹之君金甌括羽  
委命下吏陛下建大號績鴻業歸勛祖禰昭事聖皇  
是必天錫忠良佐成命器二臣所應皇運之統伏崇  
羽之兇太康西人末末來裔願篆石誌美以爲頌云  
詔虎臣兮殪天狐載火旗兮耀昆吾霽塵壘兮被戎  
都

獻平淮西雅

并序

柳宗元

臣某言臣負罪竄伏違尚書牋表奏十有四年聖恩  
寬宥命守遐壤懷印曳紱有社有人云云伏惟睿聖  
文武皇帝陛下天造神斷克清大憝金鼓一動萬方

畢臣太平之功中興之德推校千古無所與讓臣伏  
自忖度有方剛之力不得備戎行致死命況今已無  
事思報國恩獨唯文章伏見周宣王時稱中興其道  
彰大于後罕及然徵於詩大小雅其選徒出狩則車  
攻吉日命官分土則崧高韓奕蒸人南征北伐則六  
月采芑平淮夷則江漢常武鏗錡炳耀湯人耳目故  
宣王之形容與其輔佐今猶望之若神人然此無他  
以雅故也臣伏見陛下自即位已來平夏州夷劔南  
取江東定河北今又發自天衷克翦淮右而又大雅  
不作臣誠不佞然不勝憤踊伏以朝多文臣不敢盡

累數事謹撰平淮夷雅二篇雖不及尹吉甫邵穆公等庶施後代有以佐唐之光明謹昧死再拜以獻平淮夷雅二篇

皇武

方城

皇武命丞相度董師集大功也

皇者音日其武于澱于淮旣徒旣車環蔡其來狡衆昏嚚甚毒于醒狂奔叫呶以扞大刑皇咨于度惟汝一德曠誅四祀其猷汝克錫汝斧鉞其往視師師是蔡人以宥以釐度拜稽首廟于元龜旣類旣禡于社是宜金節煌煌錫鏞彫戈犀甲熊旆成命是荷度拜稽

首出次于東天子餞之曩竿是從鼎臚俎載五獻百邊凡百卿士班以周旋旣涉于滄乃翼乃前孰圖厥猷其佐多賢宛宛周道于山于川遠揚邇昭陟降連連我旆我旗于道于陌訓于羣帥拳勇來格公曰徐之無恃額額式和爾容惟義之宅進次于郟彼昏卒狂衷兇鞠頑鋒蝟斧蟾赤子匍匐厥父是元怒其萌芽以悖太陽王旅渾渾是佚是怙旣獲敵師若饑得舖蔡兇伊窘悉起來聚右禱其虛靡愆厥慮載闢載袂承相是臨馳其武刑諭我德心其危旣安有長如林曾是謹譎化爲謳吟皇曰來歸汝復相予爵之成

國祚以夏墟度拜稽首天子聖神度拜稽首皇祐下  
人淮夷旣平震是朔南宜廟宜郊以告德音歸牛休  
馬豐稼于野我武唯皇未保無疆

皇武十有一章章八句

方城命愬守也卒入蔡得其大醜以平淮右  
方城臨臨王卒峙之匪徼匪競皇有正命皇命于遡  
往舒余仁踣彼艱頑柔惠是馴愬拜即命于皇之訓  
旣礪旣攻以後厥刃王卒嶷嶷熊羆是式銜勇韜力  
日思奮殛寇昏以狂敢蹈愬疆士獲厥心太祖高驥  
長戟會矛粲其綬章右翦左屠聿禽其良其良旣宥

告以父母恩柔于肌卒貢爾有維彼攸恃乃偵乃誘  
維彼攸宅乃發乃守其恃爰獲我功我多陰謀厥圖  
以究爾訛雨雪洋洋大風來加于燠其寒于邇其遐  
汝陰之茫懸派之峨是拔是震大殲厥家狡虜旣縻  
輸于國都示之市人卽社行誅乃論乃止蔡有厚喜  
完其室家仰父俯子汝水沄沄旣清而瀾蔡人行歌  
我步逶遲蔡人歌矣蔡風和矣孰類蔡初胡甦爾居  
式慕以康爲愿有餘是究是咨皇德旣舒皇曰咨愬  
裕乃父功昔我文祖惟西平是庸內誨于家外刑于  
邦孰是蔡人而不率從蔡人率止惟西平有子惟我

有臣疇允大邦俾惠我人于廟告功以顯萬方

方城十章章八句

聖政紀頌

并序

來 鵠

穆宗皇帝臨大朝與羣臣言奏政事羣臣退而宰臣奏曰陛下問及乎政事此三皇五帝之所徽美也陛下不問及史臣此三皇五帝之所弭已也徽美者將有乎聞也弭已者將有乎亡也以聞之而又亡之則陛下徒有宵衣旰食之名規天條地之績與羣臣言後若飈然拂冠過冕湮時銷日無得用於後譬如十夫樹楊一夫拔之無得以成其大也政事羣臣得陛下

下日問之是十夫樹楊也史官執筆爲陛下日遠之是一夫拔楊也使後之人訝聖朝空晨虛夕閑殿曠廷無君臣咨謀洋溢之言之社稷安危強讜之說是不亦遠史臣致不載其事如拔去其楊將弭已之謂乎臣伏念貞觀末微之代百官之有耳目但聽視天子而已故言事者安論紆詞無疑權慮勢史官執筆于階之下天子側旒于殿之上奏者發誠于廷之中是以正衙一開則臣誠前而啓之帝旒近而鎮之史筆隨而絡之由是君臣謀國圖政之事俞機都要之言詒業發神豐編照物偕籍于堯典差光于天陽至

今見太宗文德若三皇五帝之所徽美也自末徽之後宰執不正窺伺是忌針棘前後阻越對馭狼噬虎食持膏銜肉蓋以言多爲已曾不致君內荏失中畏使人聽乃奏史官與百僚俱退然後宰臣請事由是君有問而宰臣知之史官不得與於聞君有舉而宰臣謀之史官不得記其事次第周行檢錄制誥與冗吏同工而已臣嘗涕泣以歎豈有以一已之細一性之忌於黍畷圭景之間苟嗜急湏迴天遮上使聖緒神績有嘉敷善諷罔得聞於千萬年枉有謂明朝空晨虛夕閑殿曠廷無君臣咨謀洋溢之言乏社稷安

危強謹之說若今踵而承之則不唯臣有障聰蔽睿之刺抑陛下雖有三皇五帝之所徽美而若遠史臣則三皇五帝之所弭已也抑又有一夫拔楊之謂歟臣請史官執筆當羣臣奏事隨日撰錄號爲聖政紀臣立朝荷祿幸甚穆宗皇帝動宸領旒憮然歎曰吁朕罔敢粉名厥後乃罔知厥後然聖人存簡策者亦非以粉名也蓋存乎大國之典鴻祖之業我國有典我祖有業業在于典典在于史曷厥史不書是尸余于祖涸業于典也朕纘承聖緒恭惟恪思將念厥政未嘗不離安廢酣馳荒驚遠是以每與宰臣言如簇

天下一巡省每見宰臣退而展天下盡聞知豈圖臣蓄猾謀公無同事欲弄尾舌先衛巖穴隔斥史臣占佞明后致懿搜嘉訪不存堯典之書善諷名猷莫出清廟之什史臣負我不舉其官宰輔盡忠厥聞有此由是詔史職執史筆立于廷之下錄君臣臚句之必行載剛毅進退之敢議題其篇目曰聖政紀也至上之即位三年有鄉校小臣來鵠居山澤閒常私心重惜史臣以其史臣者是當國之鏡千億代之眉目也因窺穆宗實錄得解憤釋嫉於立史官爲聖政紀者追而頌出其事以鑒今之廷列故拜獻頌曰

三皇不書五帝不紀有聖有神風銷日已何教何師生來死止無典無法頑有莽比三皇實作五帝實治成天造地不昏不圯言得非排文得聖齒表表如見者莫若乎史是知朴繩休結正簡斯若君誥臣箴觚編毫絡前書後經規善鑒惡國之大章如何寢略嗚呼貞觀多叶末徽多俞廷日發論殿日發謨牙孽不作烏鼠其除論出不蓋謀行不紆楹然史臣蛇然史裾瞠瞠而視透透而婁翹筆當固決防納污不枯爾智不席我愚執言直注史文直敷故得粲粲朝典落落廷暮聖牘旣多堯風不淺頌編坦軸君出臣顯若

儼見旒若俯見冕無閑殿曠廷無尸安素晏三皇不  
亡五帝不翦太宗得之史焉斯展暨乎後相圖身天  
子專問我獨以言史不得近丘明見嫌倚相在擯秉  
筆如今隨班不進班退史歸惘然疇依奏問莫覩嘉  
謀固稀取彼誥命祿爲國肥烱哉時皇言必及章德  
室五帝道與三皇如何翊臣嚙肉嗜豔觜距磨快楅  
衡物長控截僚位占護陽光垣私藩已遠史庾唐俾  
德音嘉訪默縮暗亡咽典噤法蓋聖寵昌曷以致此  
史文不張後必非笑將來否臧謂乎殿空宸逸朝懣  
廷荒不知姦蔽文失汪洋有貞觀業有永徽網亦匿

匪見亦寢臣彰賴有後臣知言不佞伊尹直心太甲  
須聖事旣可書史何不命乃具前欺大陳不敬曰逐  
史之喻請以物並且十夫樹楊一夫欲競栽旣未牢  
擗豈能盛帝業以栽逐史似擗穆宗憮然若疚若營  
何昔臣斯隱我祖正不傳親問不寫密諍孰示來朝  
以光神政由是天呼震爰徵奔召急史提筆來叱廷  
而入端耳抗目不撓不挹獬豸側頭螭蚪擺溼握管  
絕恰當殿而立君也盡問臣也倒誠磊磊其事鏗鏘  
其聲大何不顯細何不明語未絕緒史已錄成錄成  
謂何書政紀名伊紀清芬可昭典墳古師官鳥昔聖

官雲方之我后錄里書分錄有君法書有君文君法君文在聖政紀云殿無閑時廷無曠日雲詠波訪倦編刊筆君劬臣勞上討下述惟勤惟明在聖政紀出至德何比至教焉如孰窺孰則外夷內儲謂君有道乎臣有謨歟有道有謨在聖政紀書一體列秩同力翼戴祈福去枚絕防無礙國章可披唐文可愛善容不偷嘉論不蓋不偷不蓋在聖政紀載諒夫摠斯不朽可懸魏闕愚得是言非訕非伐實謂鑿臣渾沌開君日月妖物零死天文光發惟我之有頌兮奚斯躍而董狐歷

德勝頌二章

并序

歐陽詹

唐貞元六年歲在庚午陰陽家流曰歲在午人馬食土人之所食也穀馬之所食也草今言食土明歲無嘉穀而野無青草則運數于茲合凶災之大者於是天尋舊步地轉恒軸交糾迴薄將有結于常沴自春二月至于夏五月或赫日杲杲或密雲溶溶爲焦灼爲霖霪似不日而至皇帝宿布大和人神鳥獸魚鱉咸若騰歡心揚喜雲欣欣熙熙休氣中積浹磅礴浮蒼蒼潛相曼磨力强者勝九陽構旱而莫展六陰作潦而不就氛侵靄爲慶雲烈景皦爲祥光油油薰薰



宛復如春塊不破而雨足條無聲而風暢日者生氣  
欲凝淑氣猶競彼雖罔得爲禍此亦未能爲福徘徊  
相持時澤不降五稼含萌而待藝百芳蓄穎以思圻  
至是土膏融其液宣若決淳泉如開涌煙豐本增岐  
芄芄絲絲無磽壻與良沃獲一十於百千賸蔬雲蠹  
以委圃餘糧嶽峙而栖畝夫體病不能害心心平必  
能制體古人曰人者天地之心也旣和且平則天地  
之病又焉得成歟況奔走游泳之物曰靈曰祗之類  
皆吁歛怡逸於其中乎宜其療乾元之宿疢愈坤元  
之常疾以至於交泰如斯之盛邪古先帝王至聖則

堯至仁則湯有黎暍以稱理歷水旱而莫禦豈不以  
道未全洽而德尚涼哉皇帝非徒能禦之又易之爲  
大慶殊祥其於道德可謂充塞洋溢光今而邁古矣  
元元嗚啞歌聖代者動天殷地以夜繼晝而其詞未  
弘輒爲頌二章用貽於康衢庶事明而聲暢流乎無  
窮而以德勝日篇頌曰

歲在午天災于常昔人食土今我飫梁匪徒我飫梁  
鰥寡千箱盛矣乎吾皇之德變眚爲祥休哉德兮  
歲在午天災斯屬昔馬食土今牛饜救匪徒牛饜救  
犬豕梁肉盛矣乎吾皇之德轉禍爲福休哉德兮

歲星居心頌

并序

權德輿

皇上宅位六祀七政貞明於上七教敷聞於下其有不迪不吉不庭不若之徒皆薰然而和晻然而化春三月司天氏奏歲星居心宿五度其色黃明潤大光澤帝位積五十餘日詔下有司頒示中外故臣得而言之以形歌頌謹案歲星五帝爲蒼五行爲木五常爲仁五事爲貌天意若曰時以至仁爲理覆露萬民洽浹生類協夫五行五事之用則發於星緯形於禎應陰騭大化昭報成功玄符幽贊其昭昭如是禮運之論聖人以日星爲紀四時爲柄洪範之叙皇極曰

欽時五福用敷錫厥庶人發於人人格於天天人交感合若符節其年秋平河中之寇葬其遺骸復其世祀班淮右之師用弘文告用去武備此二帝三代所以恢令名也於是一統類以昭德明法制以塞違薦禮百神賓懷犢俗嘉瑞美祥紛委狎至置之而不有哲人端士連茹播職求之如已失然後端拱於穆清怡神於靖冥驅一代爲純誠接萬靈於明庭斯又登邁遂古光昭聞見巍乎紹天統物之盛者也微臣瓊賤沐浴仁聖敢獻歲星居心頌一章以備周詩由庚由儀之闕頌曰

皇矣上帝降鑒下人后王承之制作禮文人用明德  
家尚孝仁人無癘疵俗以阜蕃敷祐四方發爲天祥  
重華煌煌乃居明堂下煦仁澤上爲祥光回復感通  
天人攸同乃法五事乃建大中君君臣臣德輝昭融  
保佑命之自天無窮微臣頌歌敢備唐風

伯夷頌

韓愈

士之特立獨行適於義而已不顧人之是非皆豪傑  
之士信道篤而自知明者也一家非之力行而不惑  
者鮮矣若至于一國一州非之力行而不惑者蓋天  
下一人而已矣若至於舉世非之而不惑者則千五

百年乃一人而已耳若伯夷者窮天地亘萬世而不  
顧者也昭乎日月不足以爲明萃乎泰山不足以爲  
高巍乎天地不足以爲容當殷之亡周之興微子賢  
也抱祭器而去之武王周公聖也率天下之賢士從  
天下之諸侯而攻之未嘗有非之者也彼伯夷叔齊  
乃獨以爲不可殷旣滅矣天下宗周彼二子乃獨耻  
食其粟餓死而不顧由是而言夫豈有求而爲哉信  
道篤而自知名也今世之謂士者一凡人譽之則自  
以爲有餘一凡人沮之則自以爲不足夫彼獨非聖  
人自是如此夫聖人乃萬世之標準也余故曰若伯

夷者特立獨行窮天地亘萬世而不顧者也雖然微  
二子亂臣賊子接跡于後世矣

重校正唐文粹卷第二十一終

重校正唐文粹卷第二十二

宋吳興姚鉉纂  
明建武鄧羨校

頌丁政德 摠一十首

古賢宰一

處子賤碑頌 賈至

良牧三

廣州都督嶺南按察五府經略使宋公遺愛碑

頌張說

京兆尹張公德政碑頌 王維

國家圖書館 NATIONAL CENTRAL LIBRARY, TAIWAN, R.O.C.

唐衛尉卿洪州都督張公遺愛碑頌崔祐甫

興利三

復練塘碑頌李華 高陵令劉公遺愛碑頌劉禹錫

蘇州嘉興屯田紀績碑頌李翰

靈跡一

唐天台山新桐柏觀碑頌崔尚

高道一

唐中嶽體玄先生潘尊師碑頌陳子昂

宗理一

長命燈頌高邁

虞子賤碑頌

賈至

清靜致理中庸之德至高明柔克簡易之體大繹微旨而徵遺論何先生道蔚其葳蕤者也先生宣慈在躬精義入神德順乎天性根於仁殷其如雷曖然如春始受業於仲尼終委質於魯君爾乃周道凌遲王風哀思夷狄竊於位號干戈亂於原野則我魯國無齊晉之強定哀非桓文之主三卿有僭虐之政先生處此亂邦從容理邑平心氣而全耳目晏然躋富壽之域焉自非知微知彰變化無窮孰能臻此觀夫為政之大體元之要恤孤哀喪舉事問弔訓之以悌加

之以孝借五更而悟君賢三老而稟教然後燕居以佚其體張樂以和其人夜漁不戒而信欺夏不威而息是以宣尼惜君之理小子期君之政暇何其遠哉向使移於有國之君則陶唐之理也施於有政之臣則二南之化也昔舜左禹而右皋陶不下席而天下理周公殺膳在御不解懸而四夷伏小大則異其揆則同天寶初至始以校書郎尉于單父想先生行事徵其頌聲而古碑殘缺苔篆磨滅使立志之士何以揖其遺風焉嗚呼其道存而其事往其人亡而其政息哀哉遂作頌曰

鳴琴湯湯慮子之堂清淨無爲邑人以康澆風化淳霸俗致王誰謂陽鱗革而爲魴鱗鱗黃髮或師或友芄芄麥苗不稂不莠齊師已郤魯俗斯阜諫或剖心伊人引肘穆穆伊人希聖之才堯舜旣往孰爲來哉從時卷舒與道徘徊游泳孔門取容定哀泱泱千古顯顯令德聲隨悠牧惠與順息人亡政弊道播神默寂寥夜川惆悵舊國荒祠尚掃苔篆將磷尋風聆韻想見其人年代邈殊精誠闇親再表貞石頌聲惟新

廣州都督嶺南按察五府經略使宋公遺愛

碑頌

張說

維唐御天下九十有八載蒼生賁乎海隅玄澤漫乎  
荒外天子念窮鄉之僻陋徼道之脩阻吏或不率不  
馴人或不康不若乃命舊相廣平公宋璟鎮茲裔壤  
式是南州篤五管之政教摠三軍之旗鼓負萬里  
馴致九譯詔書下日靡然順風曷由臻斯威名之先  
露也公曩時執白簡登瑣闥推誠謇諤不私形骸忤  
英主之龍鱗踰奸臣之虎尾挫二張之銳則聲桓窳  
域折三思之角則氣蓋風雲由是極有四星維帝之  
輔地有五嶽維天之柱其入宰也君之股肱其出守  
也人之父母至於此邦之長人也飲食有節衣服有

常清心而庶務簡正色而羣下一瑟兮僞兮赫兮咷  
兮固以不怒而威不言而信雖有文身鑿齒被髮儼  
耳衣卉麩木巢山館水種落異俗而化齊言語不通  
而心喻矣其率人版築教人陶瓦室皆塗暨晝遊則  
華風可觀家撤茅茨夜作而災火不發棟宇之利也  
自今始祖國之舶車海琛雲萃物無二價路有遺金  
殊裔胥易其廻途遠人咸內我邊郡交易之坦也有  
如此故能言之士舉爲美談蓋微子去殷以後王者  
襄公伐楚將得諸侯尚書東漢之雅望黃門比齊之  
令德宋氏世名公其濟美詩所謂無念爾祖聿脩厥



德廣乎有焉若夫往者屈也來者伸也往來相召而  
哀樂繼之鴻飛遵渚於汝信處龍章袞衣以我公歸  
鬱陶乎人思嗟歎之不足廣府司馬譚瓌番禺耆老  
某乙等相與刻石傳徽斯文予春秋之徒也豈將苟  
其辭哉雅敬宋公王臣之重次嘉譚子贊德之義遙  
感耆舊去思之勤越裳變風知周公之才之美吉甫  
作頌見申伯于藩于宣觀政將來惡可廢也頌曰  
降王宰兮遠國靈歌北戶兮舞南溟酌七德兮考六  
經政畫一兮言不再草木育兮魚鼈寧變蓬屋兮改  
籬牆魚鱗瓦兮鳥翼堂洞日華兮皎夜火光莫炖兮

風莫颺事有近兮惠無疆崑崙寶兮西海財幾萬里  
兮歲一來舟如島兮貨爲臺市無欺兮路無盜旅忘  
家兮扃夜開越井岡兮石門道金鼓愁兮旌旆好來  
何暮兮去何早掬牛牲兮菌雞卜神降福兮公壽考

京兆尹張公德政碑頌

并序

王維

雲從龍風從虎氣應也聖人作賢人輔德同也君臣  
同德天地通氣以康九有以遂萬類惟皇御極二十  
載光格四表至于海隅日出越小大邦蠻貊師長罔  
不欽于成憲以承天休然天子猶日省三接列辟日  
聽萬方輿頌懼人有未化賢有未登故敷以陋兼乎

十等選宗室及乎九族任事以觀材積時以觀行乃得我賢京兆焉夫京兆號爲難理清淨病於不給刀筆拘於守文或以輒弱廢或以賊殺劾把宿負淺爲丈夫用鈎距蓋非長者我則異於是大道難名大理無法閉關於任數巧笑不能知堅壁於畫一善政不能下摧宿豪如薙草無愠色視大權如歷塊無傲容百司之吏揔一德以咸服五方之人雜異教而同理受命之始先聲已振黠吏惡少聞風族行及乎鳴騶詣府登堂坐定縣尹掾史以次上謁守正之人其氣高含章之人其詞大見容色而聞號令小人感而君

子泰曰者櫟陽男子閭里爲豪借客報仇聚人爲盜或白日手刃或黃塵袖鎚政寬則以身先諸偷操急則以事中長吏貳過不已萬計自脫公命吏縛之立死鈴下於是人入閭室若遇大賓焉前年不登人賴太甚野無遺糠路有委骨天子不忍征於不粒賦於無衣六軍從衛以臨東諸侯息關中也帝曰咨天其降威人罔畏罪台恐寇盜乃邑矧曰蕩析離居惟爾克濟撫茲西土公拜稽首思塞休命布慈惠之政不以利淫震雷霆之威其或宥過饗人減雙雞之膳圉人省五馬之秣淘不獻服巧不填館自身已往振廩

同食雖人煙不動道饑相望不思濫以苟生成守教以就死是不可能也先是王公或專南山之利司農涸昆明之池收赤岸澤將爲田以便官至是悉奏罷之舟漁衡麓之守廢蒲荷薪蒸之產入自郊徂邑室有魚殮斬陰伐陽市多山木人得以贍惟涇有防比歲多決近縣疲於力役他山遺於度材公命刮朽壤填巨石辯大木去編管其始告勞乃終有慶匠石日減功萬藏史日省錢億農始學耒女始安織於是鮐背黃髮之耆曰我有田疇鍾秉其畝我有子弟顏閔其行鄉黨以睦學失其獨道路有禮汰無與爭酒先

養老賄不問吏旣無吠狗亦無奸人臨年餘資竊蒙惠化其曷以臻茲君子曰此天子至公內舉不避親錫汝明尹張公之力也夫公於國爲外戚於帝爲外弟重組累印珥香貂者七葉奉車駙馬乘朱輪者十人勝衣則綺襦紈袴通籍則玉墀青瑣動則兩駟如舞坐則五鼎成列文軒楚製素女趙舞而公儼兮其若容淡兮其無味心在四教語稱七德目視六籍口誦九歌懷君子令德之忠保詩人錫類之孝悌有過於共被慈有踰於含食惡衣以居公服不敢降也屈體下士王綱不敢替也協二姓之好以正人倫傍無

變御分一人以憂以審官政下多英傑若夫皇帝敬問之詔御札自書天王命賜之衣上官所製勞勤則中使接武計議則走馬來朝豈惟衆臣重其經術爲吏雜以儒雅而已且公之德升聞于天非一朝一夕之漸也亦以稱職於累官著聲於所在其丞祕書也闕文遺簡多在大家深爲子孫之藏密有緘滕之固公不憚權貴或抵或誘盡歸天閣官書備焉其牧郢人也人有不若德戮之不爲暴人有不保居撫之不爲諂存者考其事壯其食以畜之行者緝其官藝其樹以待之此邦之人旣優他邦之人又至焉未盈一

歲遂增萬戶其守汾也仍歲大旱郡祠介推雖屢舞僊僊而靈應未若公命束蘊取火伐樹寘薪醜酒而祝曰有功於人祀爲明神無德而祿禍亦覆餗自絳已來人實祀子純犧大璧不敢愛必以薦也童兒季女不敢黷必以敬也神旣靡吝人將安仰若亭午而雨則樹其鷺羽執此駢毛不然者火燎將至炊天鑠地靈衣且爲煨燼豐屋將爲茂草爾其圖之言未畢而雲興拜未起而雨降周於闔境不入他郡雖封疆咫尺而彼竭我盈嘻若記能事載盛德渭川之竹不足簡終南之木不足軸夫訓人至於禮義曰德安人

免於阽危曰功德者上賞於上下頌於下長老孜孜願刊于石以予學於舊史來即我謀且維與人編戶與人爲伍與人出入與人言語知風俗之淳弊識政化之原本屬詞媿文書事蓋實詞曰

五代相韓七葉侍漢及我聖朝亦生邦翰大道無形貞蠱以幹含章不耀在割能斷情僞萬端吾道一貫帝選賢尹無以易張金印紫綬京兆之章佩我鳴玉冠我兩梁天子休命拜首以將寬而愛人立滅暴強明明天子哀此南畝將息西人遂覲東后我教我訓我鎮我守茫茫三秦則罔鋤口守死以義徇生不苟

王曰外弟視人不佻何以寵之手書以詔何以問之賜衣而朝俾人華胥致君帝堯刻石作頌永世彌昭

唐衛尉卿洪州都督張公遺愛碑頌

并序

崔祐甫

今天子終諒闇易月之期不言旣言之日詢于師保輔弼之臣曰將以國之明燭震下土俾兆人康乂有道哉四臣曰莫如擇賢而司牧之雖欲不理不可得也上曰用賢何先四臣曰莫先於幽遠蠻貊之邦爲急也即日命王人遽以制書統拜衛尉卿兼洪州都督張公爲御史中丞廣州刺史嶺南節度經略觀察

等使既踰月而遽届于洪洪之耆老娶博商販魚釣百類千品同聲奪魄于野于廛咸曰寧取我裳而裂之寧取我廩而焚之父也天只胡爲奪我之君中丞受命而南舟不及汎馬不及秣國人懷慕之罔極曰清塵遠矣君不顧矣鬱陶之思何用哉蓋用於揚名頌德乎故吏兵曹參軍張擢法曹參軍豫章縣令鄭鋒建昌縣令盧惟瑾新吳縣令鄔賁州人東冶府果毅劉容耆壽喻乾相等討論之衆僉曰允於心曰自昔爲政者知清之可以長人也而清者稀豈不欲清欲牽之也欲之所行不廉不儉爲之舟輿也清之不

立肆奢崇貨爲之鑽鑿也於是撤其帷帳薦蓐之具便於身悅於目者二百餘物歸之有司減其俸錢稍食月幾十萬實於軍府此皆前政之所習沿而封已者我則推而遠之於是公儀之義申平仲之規見矣二之日謀於衆曰昔曹叅去齊以獄市爲寄以爲擾於獄者輕重人之命煩於市者耗斃人之生苟鞭笞折楊之無度侵牟肆奪之不改是國家以章綬印璽毒蒼生也豈政理哉於是平百貨之貴賤議刑罰之等衰使其貪不下殘忿不私逞韓子求環而不可使人袒背而無傷夫然噬嗑之象成行葦之恩溥矣三

之日謀於野曰不稼不穡民天安仰載馳驅王命所急吾觀是邦農野未闢傳置未修豈不以使役無期供億失序儻野有餓殍賓不如歸亦諸侯之耻也於是減乘城更卒幾三千歸之隴畝而擊析之守無闕焉賦豪墾財數百萬賙于館餼而含糗之徒不知也其卒也不公之吏留以爲廝其財也不法之臣受以潤屋我皆用之於愛人活國也於是阜藩之望崇多大之儀備矣從政三日州人愛之如父母承之如松柏夫婦耕織之暇無他懼惟懼公速遷其餘煦嫗孕育發於中而形於言損其身而益於物可以激積

俗慰窮甿者豈勝道哉祐甫山東鄙人不好妄飾凡所聞見務存實錄故採拾而書之公名休字詳幽州范陽縣人有晉司空茂先之遠裔也曾祖汲易州長史祖選幽州固安縣丞考價贈齊州司馬公起家石亭別將自是爲縣令軍司馬州長史各一入爲天子友儲君臣雖假以寵名而跡實戎索受命爲范陽節度安祿山判官祿山以大權大寵外示忠而內謀逆太上皇推赤心而勿疑敢有間之者死蹈虎尾犯龍鱗公密言其戎狄豺狼不可厭也當是時也視鼎鑊如歸焉神之聽之是與正直周旋鋒鏑之下出入寇

讎之間而能終保元吉漸于貴仕進退存亡而不失其正其惟張公乎又牧豪舒潤三州以及此昔張黃門庭珪牧此州甚得人譽張丞相九齡次之逮府君又有裕焉故邦人有三張之目頌者美盛德之形容非曾僖公仲山甫不之獲今茲頌曰

昔爲豫章故有循良黃門之善于今不忘爰及丞相亦有烈光我君戾止是爲三張立廉寶儉無怨無傷郵亭之下賓旅其康四封之內望歲千箱自春徂夏兮人相慶慶未畢兮聞後命朱轡玉節兮向番禺彼願適兮我望孤君乎君乎若歲大旱其誰見濡

潤州丹陽縣復練塘頌并序 李華

大蜡之祭辭曰土反其宅水歸其壑先王因流下而導之故曰九川滌源因迤匯而潄之故曰九澤旣陂以䟽天地之氣以利元元之用崇伯汨五行而殛羽山臺駘童大澤而封汾州洪範首之春秋載之地有廣狹事無今古大江具區惟潤州其數曰練湖幅員四十里菰蒲菱芡之多龜魚鼈蟹之生厭飫江淮膏潤數州其傍大族強家泄流無田專利上腴畝收倍鍾富劇淫行自丹陽延陵金壇環地三百里數合五萬室旱則懸耜水則具舟人罹其害九十餘祀九經



上司紛紜與奪八十一斷嗚呼曲能掩直強者以得之老幼怨痛沈聲無告永泰元年王師大翦西戎西戎既駭矣生人舒息詔公卿選賢良先除二千石以江南經用所資首任能者是歲十一月二十三日拜前常州刺史京兆韋公損爲潤州聲如飈馳先詔而至吏人畏伏男女相賀即日上無貪刻下無冤憤公素知截湖閩壤災甚螟螣臨事風生指期以復羣謗雷動山鎮恬然中明獨裁文之以禮乃白本道觀察使兼御史中丞韋公元浦中丞撫掌愜心如公之謀且曰興利除害得其人而後行非常之政敢歸叔父

公乃申戒縣吏率徒闢之人不俟招呼拊從役畚鍤蓋野枯槁成蹊增理故塘繚而合之廣湖爲八十里像月之規儔金之固水復其所如鯨噴射洶洶隱地雷聞泉中先程三日若海之彌望灝灝如吞吐日月沈沈如韞蓄風雨所潤者遠原隰皆春耕者飽憂者泰於是䟽爲丰門旣殺其溢又支其澤沃壻均品河渠通流商悅奠價人勇輸賦遐邇受利豈惟此州每歲萌陰乘陽二氣相薄大雨時行羣潦奔流水勢所入盈而無傷龍見方雲稼蒙其渥時前相國彭城公劉尚書晏統東方諸侯平其貢稅聞而悅之白三事

以聞詔書褒異焉彭城公宣命至江南奉詔授公公率元僚掾史令丞已下至于耆艾西向拜手忻戴望明人心上感天降嘉澤如有神祇昭協厥至公正直而和專靜而斷嫉惡宥過惠人察奸純鈞精堅百鍊不耗伐冰之貴降從士禮詩云靖恭爾位好是正直宜其享福也吏人入賀公拱而謝之曰尚書劉公觀察韋公奉行王澤也鄙何力之有焉丹陽令杜孟寅秉公之清白延陵令李易從如公之愛人金壇令胡玘稟公之成規及丹陽耆壽周孝瓌百姓湯源等拜首而請曰允爲澤允悅也水歸於澤而澤悅於人百

年浸塞而公救之臣哉鄰哉克諧帝休永代是式三縣無災若不碣而刻之則王命不揚於厥後後之人無以倚負也華嘗學古見訪爲頌曰

望泯泯兮視冥冥鳥閑魚樂葭莢生膏腴利倍起訟爭斯人怨抑痛無聲韋公正直動神靈百年游淀爲溲清飢者飫兮病者寧詔書光寵恩霈榮劃然眊瞢復皎明追琢刻頌揚茶馨

高陵令劉君遺愛碑頌

并序

劉禹錫

縣內之大夫鮮有遺愛在其去者蓋邑居多豪政出權道非有卓然異績結于人心浹于骨髓安能久而

愈思大和四年高陵人李仕清等六十三人具前令劉君之德詣縣請以金石刻縣令以狀申于府府以狀考于明法吏吏上言謹按寶應詔書凡以政績將立碑者其所紀之文上尚書考功有司考其詞宜有紀者乃奏明年八月庚午詔曰可令書其章明有以結人心者揚揭于道周云涇水東行注渠醜而爲三以沃關中故秦人常得善歲按水部式決洩有時畎澮有度居上游者不得擁泉而顯其腴每歲少尹一人行視之以誅不式兵興已還寤失根本涇陽人果擁而顯之公取涇流浸原爲畦私開四竇澤不及下

涇田獨回他邑爲枯地力旣移地征如初人或赴訴泣迎尹馬而占涇之腴皆權倖家勢足以破理訴者覆得罪繇是咋舌不敢言吞寃銜恐相視愁蹙長慶三年高陵令劉君勵精吏治視人之瘼如燹疽在身不忘決去乃循故事考式文暨前後詔條又以新意請更水道入于我里請杜私竇使無棄流請遵田令使無越制別白纖悉列上便宜椽吏依違不決居二歲距寶曆元年端士鄭覃爲京兆秋九月始具以聞事下丞相御史御史屬元谷實司察視持詔書詣渠上書得利病還奏青規中上以谷奉使有狀乃俾太

常撰日京兆下其符縣主簿談孺直實董之冬十月  
百衆雲奔憤與喜并口謠手運不屑薜皮揆功什七  
八而涇陽人以奇計賂術士上言白渠下高祖故墅  
在焉子孫當恭敬不宜以畚鍤近阡陌上聞命京兆  
立止絕君馳詣府控告具發其以賂致前事又謁丞  
相請以顙血汚車茵丞相彭原公歛容謝曰明府真  
愛人陛下視元元無所怙弟未周知情僞耳即入言  
上前翌日果有詔許訖役仲冬新渠成涉季冬二日  
新堰成駛流渾渾如昧宣氣蒿荒漚冒迎耜釋怨開  
塞分寸皆如詔條有秋之期投鍤前定孺直告已事

君率其寮躬勞俸之烝徒謹呼奪襪而舞咸曰吞恨  
六十年明府雪之擿奸犯豪卒就施爲嗚呼成功之  
難也如是請名渠曰劉公堰曰彭城按股引而東千  
七百步其廣四尋而深半之兩涯夾植杞柳萬本下  
垂根以作固上生材以備用仍歲旱沴而渠下田獨  
有秋渠成之明年涇陽三原二邑中又擁其衝爲七  
堰以析水勢使下流不厚君詣京兆府言之府命從  
事蘇持至水濱盡撤不當擁者繇是邑人享其長利  
生子以劉名之君諱仁師字某彭城人武德名臣刑  
部尚書德威之五代孫大曆中詩人商之猶子少好

文學亦以籌畫于東諸侯遂參幕府歷尹劇縣皆以能事見陟率不時而遷既有績于高陵轉昭應令俄兼檢校水曹員外郎充渠堰副使錫朱衣銀章計相愛其能表為檢校屯田郎中兼侍御史幹池鹽于蒲錫紫衣金章歲餘以課就加中執法理人為循吏理財為能臣一出于清白故也先是高陵蒙被惠風而惜其捨去發于曾懷播為聲詩今采其旨而變其詞志于石文曰

噫涇水之逶迤慨我公兮及我私水無心兮人多僻錮上游兮乾我澤時逢理兮官得材墨綬移兮劉君來能愛人兮恤其隱心既公兮言既盡縣申府兮府聞天積憤刷兮沈痾痊劃新渠兮百畎流行龍蛇兮止膏油遵水式兮復田制無荒區兮有良歲嗟劉君兮去翱翔遺我福兮牽我腸紀成功兮鑄美石末信詞兮昭懿績

蘇州嘉興屯田紀績頌

并序

李翰

禹平九土溝洫之功大棄粒蒸人稼穡之務重自古有國家未嘗不率由斯道底慎其業故登平足以厚生殖禍難足以定凶災未有易此而能理者自羯戎亂常天步多艱兵連不解十有四年因之以饑饉重

之天札死者曝露亡者惰遊編版之戶三耗其二歸耕之人百無其一將多於官吏卒衆於農八古者八家爲鄰一家從軍七家從之猶曰興師十萬內外騷動不得操農桑者七十萬家今乃以一夫家食一伍一餘于衣一卒師將不立人將不堪此聖上所以旰食宵興求古今令典可以濟斯難者莫出乎屯田廣德初乃命相國元公昌其謨分命諸道節度觀察都團練使統其事擇封內閑田荒壤人所不耕者爲其屯求天下良才善政以食爲首者掌其務屯有都知羣士爲之都知有治卽邑爲之官府官府旣建史胥

備設田有官官有徒野有夫夫有任上下相維如郡縣吉凶相恤如鄉黨有誅賞之政馭其衆有教令之法頒于時此其所以爲屯也雖天子命之股肱贊之至於宣上命齊下力經地域制地事辨土宜均土法簡穡器修稼政陳三壤之種而敬其始考九農之要而成其終則都知之職專達其事焉詎可以非其人哉浙西觀察都團練使御史中丞兼吳郡守替皇公王國大賢晏公如家慎擇厥官以對明命浙西有三屯嘉禾爲之大乃以大理評事朱自勉主之且楊州在九州之地最廣全吳在揚州之域最大嘉禾在全

吳之壤最腴故嘉禾一穰江淮爲之康嘉禾一歉江  
後公首選於衆獨當其任有寬簡惠和之德  
知艱難勤儉之事政達乎本智通乎時仁愛足以結  
下機權足以成務嘉禾大田二十七屯廣輪曲折千  
有餘里公畫爲封疆屬於海濬其畎澮達于川求遂  
氏治野之法修稻人稼澤之政芟以殄草剔以除木  
風以布種土以附根頒其法也冬耕春種夏耘秋穫  
朝巡夕課日考旬會趨其時也勤者勞之惰者勗之  
合耦助之移田救之宣其力也下稽功事達之于上  
上制祿食復之于下叙其勞也至若義感於內誠動

於中徇國忘家恤人猶巴野次露宿簞食瓢漿盡四  
體之勤趨一時之役大寒粟烈而猶執鼗鼓盛暑赫  
曦而不傳車蓋如登高去梯與之死生投醪均味忘  
其饑渴然後知仁義之政必見於耕穫井田之法可  
施於甲兵夫如是人將竭其力地將盡其利天將與  
其時自贊皇爲郡無凶年自朱公爲屯無下歲元年  
冬收入若干斛數與浙西六州租稅埒朝嘉厥庸授  
廷尉評公又稽氣授時如前代法有白雀集于高豐  
屯廩蓋大穰之徵也屯官某乙等聚而稱曰初公爲  
屯人有二懼焉邑人懼其暴屯人懼其擾今溝封犬

牙而不相侵疆場日履而人不知方舟而上以饋師  
旅此功及於國也登量而入以寬征稅此德加於人  
也古者智效一官政修一鄉猶歌之誅之手之足之  
況朱公之績如此其大者乎遂相與斲琬琰表阡陌  
南陽太守豈專刻石之功桐鄉嗇夫終踐大農之位  
其辭曰

茫茫九區陽九躔災丘荒札瘥田卒污萊天步未移  
連師滿野不耕不穫仰食于下嗷嗷遺人餬口饋軍  
帝曰予憂爰立其屯且戰且耕古之善經群師肅祇  
王命是聽嘉禾之田際海茫茫取彼榛荒畫爲封疆

朱公莅之展器授方田事旣飭黎人則康我屯之稼  
如雲漠漠夫伍棊布溝封綺錯朱公履之勸耨趨穫  
稂莠不生螟螣不作歲登億計征寬稅薄息我蒸人  
遂其耕鑿我屯之庾如京如坻嘉量是登方舟是維  
贊皇獻之達于京師飽我六軍肅將天威畎距于溝  
溝達于川故道旣堙變將爲田朱公濬之執用以先  
浩浩其流乃與湖連上則有塗中亦有船旱則漑之  
水則泄焉曰雨曰霽以溝爲天俾我公私永無饑年  
公田翼翼私田蕤蕤不侵其畔不犯其穡我倉旣盈  
爾廩維億屯人熙熙邑人怡怡不擾其務不干其時



我無爾暴爾無我欺我有官屬朱公訓之我有徒位朱公恤之我有衆役朱公率之我有微功朱公序之起於田中印綬纍纍何以況之福祿如茨何以久之刻篆于碑

唐天台山新桐柏觀碑頌并序崔尚

天台也桐柏也代謂之天台真謂之桐柏此兩者同體而異名同契乎玄道無不在夫如是亦奚必是桐柏邪非桐柏邪因斯而談則無是是無非非矣而稽古者言之桐柏山高萬八千丈周旋八百里其山八重四面如一中有洞天號金庭宮即中右弼王子晉

之所處也是之謂不死之福鄉養真之靈境故立觀之初強名桐柏焉耳古觀荒廢則已久矣故老相傳云昔葛僊公始居此地而後有道之士往往因之壇址五六厥迹猶在洎乎我唐有司馬練師居焉景雲中天子布命于下新作桐柏觀蓋以光昭我玄元之丕烈保綏我國家之末祉者也夫其高居八重之一俯臨千仞之餘背陰嚮陽審曲而勢東西數百步南北亦如之連山峩峩四野皆碧茂樹鬱鬱四時恒青大巖之前橫嶺之上雙峯如闕中天豁開長澗南瀉諸泉合漱一道瀑布百丈懸流望之雪飛聽之風起

石梁翠屏可倚也琪樹珠條可攀也僊花靈草春秋互發幽鳥清猿晨暮合響信足賞也始豐南走雲嶂間起剡川北通煙岑相接東則亞入滄海不遠蓬萊西則浩然長山無復人境摠括奧祕鬱爲秀絕包元氣以混成鎮厚地而安靜非夫神與僊宅僊得神營其孰能致斯哉故初構天尊之堂晝日有雲五色浮靄其上三井投龍之所時有異雲氣入堂復出者三書之者記祥也然后爲虛室以鑿戶起層臺而壘土經之殖殖成之翼翼綴日月以爲光籠雲霞以爲色花散金地香通玄極真侶好道是遊斯息微我練師

孰能興之練師名承禎一名子微號曰天台白雲河內溫人晉宣帝弟太常胤之後祖晟仕隋爲親侍大都督父仁勗唐興爲朝散大夫襄州長史名賢之家奕代清德慶靈之地生此仙才以爲服冕乘軒者寵患吾身也擊鐘陳鼎者味爽人口也遂乃損公侯之業學神僊之事科錄教戒博綜無所遺窈冥夷希微妙詎可識無思無爲不飲不食仰之彌峻巍乎其若山挹之彌深湛乎其若海夫其通才練識瞻學多聞翰墨之工文章之美皆忘其所能也練師蘊廣成之德睿宗繼黃軒之明齋心虛求將倚國政侃侃然不

可得而動也我皇孝思維則以道理國協帝堯之用  
心寵許由之高志故得放曠而處逍遙而遊聞練師  
之名者足以激厲風俗睹練師之容者足以脫落氛  
埃以慈爲寶以善救物神以知來智以藏往允所謂  
名登仙格迹在人寰奧不可測已夫道生乎無名行  
乎有情分而作三才播而作萬物故爲天下母脩之  
老昌背之者亡故爲天下貴況絕學無憂長生久視  
也哉道之行也必有階也行道之階非山莫可故有  
爲焉有象焉瞻於斯仰於斯若舍是居教將奚依損  
之又損之以至於無爲玄門旣崇不名厥功朝請大

夫使持節台州諸軍事守台州刺史上柱國賈公名  
長源有道化人有德養物嘗謂別駕蔡欽宗等曰且  
道以含德德以致美美美而不頌後代何觀乃相與立  
石紀頌以奮至道之光其辭曰

邈彼天台嵯峨崔嵬下臨滄海遙望蓬萊漫若天合  
呀如地開煙雲路通真仙時來顧我練師于彼瓊臺  
練師練師道入玄微喻曰安坐凌霄欲飛興廢靈觀  
練師攸贊道無不爲美哉輪奐窈窕茫茫通天降祥  
保我皇唐如山是常

唐故中嶽體玄先生潘尊師碑頌并序

陳子昂

尊師業尚冲密勤密幽深理心事天所保唯齋絕聖  
棄智不耀其光故真感冥期珍圖祕學性與天道不  
可得而聞也若乃崇標曠迹遐情遠意志摩青雲蓬  
視紫闥高宗每降鸞輦親詣精廬尊師身不下堂接  
手而已每歎曰大丈夫業於道不能投身霄嶺滅景  
雲林而疲痾此山以煩世主吾之過乎遂欲東求蓬  
萊孤舟入海屬天皇敦篤斯道祈款逾深躊躇山隅  
絕策未往旣而金革有命鑣轡遺區於戲昔姑射有  
神人堯輕天下崆峒有至道軒屈順風玄真高蹤萬

古同德何其盛哉尊師有弟子十人並仙階之秀然  
鸞姿鳳骨眇愛雲松者唯潁川韓法昭河內司馬子  
微皆稟訓瑤庭密受瓊室專太清之業遺下仙之儔  
谷汲芝耕服勤於我蓋歷歲紀也始尊師受錄於茅  
山昇玄王君王君受道於華陽隱居陶公陶公至子  
微二百歲矣而玄標仙骨雅似華陽夫偕真蹈冥鍊  
景遊化者其心必有類乎昭等未惟尊師靈迹洞業  
高深邁古而棄世往矣其若之何乃斲石幽山勤頌  
玄德其辭曰

觀元化兮求古之列仙得瑤圖與金鼎信元符之自

唐文粹 卷二十一  
然神與道而惟一天與人兮相連苟精守以專密必  
駕景而凌煙丹丘不死兮羨門子黃宮度世兮吾體  
玄體玄之至德兮洵淑美沖心養和寶元始初學茅  
山濟江水乃入華陽洞天裏道逢真人兮昇玄子授  
以寶書青台旨令守崧山玉女峯雲棲窮林今五紀  
聖人以萬機爲貴而我以天下爲累聖人以大寶爲  
尊而我以天下爲煩是以冥居於嶷嶸寄遺跡於軒  
轅有唐高宗兮天子之光好道樂仙兮思彼雲鄉千  
旌萬騎兮翠鳳凰遨遊汝海兮箕山陽朝拜白茅夕  
紫房齋心絜意緬相望祈問玉真及玉皇何以得之

受天昌黃庭中人在子身窈窕冥冥精甚真去汝驕  
氣與淫神勤能思之道相親遂解形而遺世乘白雲  
而上賓弟子不知其所往乃刻石以思真

長命燈頌 并序

高邁

离婁之目處闇室或不能覩燈處之皎如也澄公之  
掌在玄夜或不能照燈察之了如也故大雄氏以方  
便力救黑暗界藉其光誘其人佛所以有然燈名法  
所以有傳燈義大抵長明燈是其蘊乎夫日主晝太  
陽之精中則昃昃則沒我長明燈不沒月主夜太陰  
之精滿則虧虧則盡我長明燈不盡日月尚爾況小

光小明哉要自積苦爲海舉足見溺積邪爲山舉手見礙竟不髣髴之或髣髴之不克成就之言之可爲長歎我邑中有俊傑主此然燈精進成就於寶融寺經藏院且夫蘭炷爇火吾見其盛未見其微也鐵盆盛膏吾見其增未見其減也一籠而四時長花滿室而終歲不夜人見之者一作禮眼蒙利再作禮心蒙爽心眼自相照了內外由是洞徹然則終日見燈未嘗見燈終日不見燈未嘗不見燈夫達觀者乃如是也意者不獨於此直上照一天二天乃至三十三天無門不闢恒沙善人由茲而入直下照一地二地乃至一十八地有獄皆開多劫罪人由茲而出若然者四維上下虛空可思量邪不可思量邪我長明燈實相功德亦復如是邁三數年內願銘頌之間迫賤事未構斯文一朝染目疾朦朧而不自審從何得也遂夢神人語邁曰子於長明燈其有負乎邁應聲而寤寤而起起而作頌明日日愈頌曰

見外燈長明見內燈長明萬惡自光中滅萬善自光中生不見一燈百千萬億燈乃至於無窮不見一人百千萬億人歸之於大同空則是色色卽是空弟子作頌允執厥中

重校正唐文粹卷第二十一終

國家圖書館, NATIONAL CENTRAL LIBRARY, TAIWAN, R.O.C.

重校正唐文粹卷第二十二

宋吳興姚 鉉纂  
明建武鄧 漢校

頌戊 摠五首

祠祀三

旌儒廟頌 并序 賈至 陝州鐵牛頌

少華山佑順侯碑頌 房鄴

監牧二

大唐開元十三年隴右監牧碑頌 張說

岐邠涇寧四州八馬坊碑頌 郗昂

國家圖書館 NATIONAL CENTRAL LIBRARY, TAIWAN, R.O.C.



旌儒廟頌

賈至

觀象考曆本乎元辨方正位稽乎極體元御極莫先乎教教之大莫大於儒旌儒有祠我新典也昔秦滅義軒之制廢唐虞之則大搜學徒竭索儒黨懷書捧檄者鱗集麀至然後罪九流之異論尤百氏之殊術無辜殺身有道併命冤骸積於坑谷流血染於泉壤蹈仁義而死者不可勝紀開元末天子在驪山之宮登集靈之臺考圖驗記周覽原隰見鄉名坑儒頽漸猶在慨然感亡秦之敗德哀先儒之道喪強死千載遊魂無依乃詔有司是作新廟牲幣有數以時饗祀

因祀命鄉號曰旌儒人神和悅怨氣銷散於戲秦皇帝以神武邁古并吞六合掃天下以一簞芟羣雄如衆草建官罷侯大權在已自軒轅以降平一宇宙未有若斯之盛也夫戡亂以武守武以文文以正崇武以權勝秦皇知權之可以取不知正之可以守嚮使天下既定守正崇儒導六經之謨訓用三代之文質則唐軒盛美湯武弘業不若也觀夫坑儒焚書之意乃欲蓋先王之能事竊作者之鴻名黈衆耳以前聞逞私欲於當代此儒之所忌也秦之所志悲夫儒以恭儉爲宗秦則疲弊生人極力宮室儒以道德柔遠

秦則竭耗中國勞師四夷儒以宥過議賢秦則刻法峭刑賊害諫輔儒以述先好古秦則師心徇智播棄典墳夫如是則秦不得不滅儒不得不坑事使然也今天子矯覆車之前軌崇明祀於後葉秦之所廢我之所興斯區夏無疆之休子孫萬代之福也昔武王封比干之墓則招諫之道勸矣晉文表絳上之田則志過之名立矣漢高護信陵之冢則尊義之風著矣未若激揚大教廟食衆賢上以興天地之經次以存顛覆之鑒下以絕厲災之肯建一祀而三德具焉鯁臣不敏敢獻頌曰

於維先王設教崇儒作訓六經爲代典謨降及夫子三千其徒載揚清風文在茲乎天喪斯文道有通塞寔生暴秦反道背德竊善攘譽師心徇惑焚書坑儒萬古悽惻牢落千祀微茫九原驪山之北坎窞猶存草樹無顏秋雲晝昏時聞夜哭知有冤魂帝在華清登高訪古愍默頽漑悲涼榛莽上感亡秦覆車遺武下哀羣哲饗祀無主爰降嘉詔聿脩清祠饋之牲牢奠酌以時幽幽廟門肅肅靈儀冥冥求食長無餒而粵自漢初迄于隋閏亦有令主尊儒尚訓闕典罔崇斯文莫振昭昭神理長懷幽憤我后濬哲聰明文思

敷弘大教咸秩神祇鬼無妖災人不癘疵俾爾蒼生  
富壽無期小臣作頌敢繼刪詩

陝州鐵牛頌

并序

乾象元地勢坤稽謀惟觀察孰見元善利物純陰隲  
而不仁坤順爲牛或剛克以殊用彼見於陝鄂者其  
陰隲歟其剛克歟寓精堅強壯趾慎固內習坎窞外  
形端倪居于道周敦兮若樸謂爲首匪如山之狀謂  
用角匪如栗之象曾覽古史罔徵其由深不可識孰  
知其故吾將本自然歸神功豈謀人力役鬼傭哉東  
臨周畿西盡虢略載厚地而莫聳拒長河而不崩向

使非神或微憑子之力則城復隍矣人其魚乎乃詢  
耆耄聽輿誦僉曰此之鎮其日固久人由是怙恃物  
由是生資嘗欲掘地及源以觀其微充徒執用大臻  
于茲橫縻林縷四進雲鍾尋下體之極達純陰之精  
其餘退諸泉而入于穴俾圍木靡拉懸緝絕縋旣致  
乃窅其見如初五丁力拔而不及方舟鎖曳而奚可  
虎無所措其爪猛焉能噬兵無所容其刃投豈皆虛  
鑣鑣行人悠悠終古當函關之路望若隨仙俯桃林  
之墟時得歸獸若以匹敵必於其倫則長蛇遶閭風  
而周巨鼇負蓬萊而抃可明徵矣且察內以外觀遠

以近在端鉞而未固未可量也亦何知不磅礴數州之間日用有迷其力矣夫能利於物帝之念擇善而爲臣之忠是以我國家咸秩無文發天使以祀我明牧謀始有作招墨客以頌頌者誦也容也誦令德昭厥容翼穆如清風敢刊之貞石頌曰

杳冥精兮混茫氣凝爲伏牛載厚地巨靈西掌屹巖負長河東流汙沸涓堅立不動神之至層城固護人大庇德合無疆其可旣昔人無述今之是志

少華山佑順侯碑頌

并序

房鄴

上嗣位九年以宗室弄兵皇居失守大駕東狩至于

華嶽明年同華連帥大傅許公罷藩邸兵復諸子位正皇儲立母后朝廷又安中外咸若又明年宮闕復就乘輿反正封少華佑順侯崇祀也始者內兵橫起右輔搔然警蹕難追宗社不復扶持關輔徒爲扃鏑抗表奉迎莫廻天睠公即馳單騎詣行在所肉袒徒跣雪泣上言曰廟主不行陵寢不告蒼黃順動莫知攸往況西無正名之伐東異省方之行南征無復國之期北濟乏召君之慮華當關右不遠王畿未虧巡狩之名免負出君之耻可以爲百辟會朝之地諸侯輸貢之府地雖不廣足以助供億兵則非衆足以備

扞禦時也謹論確然宸心不返宣問往復至于再三嘉謨不聽忠言不納大事將去羣心恟然關內諸侯惟公獨任非神啟聖不能釋明主之疑非神祐忠不能壯純臣之節既而上察公之志不可奪也諒公之言必可復也由是天廻日轉龍起雲從乃睠是邦因駐清蹕上復交泰之道下無疑間之憂內難旣夷外兵以息皇嗣之不正者濱于五紀今則因公以正之坤儀之不定者殆乎百稔今則因公以定之君臣以協父子以親夫婦以倫有國之大本也公一舉而得之豈筆舌所能論哉咸以公仗順討逆神實佑之佑順之封非神莫尸璽書爰來牲幣以告是命下客書石誌之鄴耳曰奇功縑緗具美授簡執筆略無愧辭姑錄許公貞順之誠少華保佑之實以明報神以勸事君至於極天鎮地之崇固國經邦之力降神生賢之運僊峯靈掌之竒嶽有舊封國有常祀今茲紀述故不復云頌曰

惟華之始因山以紀蓮峯東秀終南西峙少華居中不封不紀歲在景辰暴兵中起天子震驚蒙塵旅次豈無近藩諸侯莫至惟我許公聞風奮臂一騎迎鑾六龍廻轡行朝有亭行廟有位宗戚以歸兵戎以弭

爰立母后始正皇嗣乃君乃臣乃父乃子家國大倫禮無違事社既啓侯封亦明祀金天之毗佑順之美乃刻貞珉未證惇史

大唐開元十三年隴右監牧頌德之碑并序

張說

周禮校人掌王馬之政天子十二閑馬六種閑爲一廐馬二百一十六應乾之策也六廐成校五良一駑是之謂小備校有左右閑成十二合月之道也駑馬三良馬之數凡三千四百五十六是之謂大備秦并一海內六萬騎之國馬盡歸之帝家則周制陋矣漢

孝武富文景儉局之積雄衛霍張皇之勢勒兵塞上廐馬有四十萬匹及東漢魏晉國馬陵夷不可復逮寺矣後魏胡馬入洛蹴蹋千里軍陣之容雖壯和鑾之儀亦闕大唐接周隋亂離之後承天下征戰之弊鳩括殘燼僅得牝牡三千從赤岸澤徙之隴右始命太僕張萬歲葺其政焉而弈世載德纂修其緒肇自貞觀成于麟德四十年間馬至七十萬匹置八使以董之設四十八監以掌之跨隴西金城平涼天水四郡之地幅員千里猶爲隘狹更拊八監布於河曲豐曠之野乃能容之于斯之時天下以一縑易一

馬秦漢之盛未始聞也張氏中廢馬官亂職或戎狄外攻或師圍內寇垂拱之後二十餘年潛耗太半所存蓋寡開元神武皇帝登太寶受靈符水瑞感而河龍出星精應而天駟下二年春帝乃簡心腑善畜之將卜福佑宜生之長俾領內外閑廐使馬卽開府霍國公其人也公名毛仲姓王氏開元佐命之元勳東國亡王之後裔四伯輔禹與治水之謨四七興漢在經星之列清明虛受察含冰鑑籌謀先覺慮出蒼龜竭無私之忠而善歸天造輸不懈之力而玄同日用故得騰躍風雲攀附日月策功第一承恩莫二庭羅

魏絳之鐘鼓第賞京邑之山林文馬蕃錫於晉侯御衣亟分於韓信庶姜如玉則降榮彤管衆子垂髻則抱拜朱第聖人之見也必道爾爲之四顧而滿志聖人之不見也乃恤然若無與樂其天下仲尼所謂是必才全而德不形者也夫處其身則立無跂正也視無還端也聽無聳誠也言無遠慎也國有憂未曾不感國有慶未嘗不怡其御下則明利害之鄉阜財求之務使之趨善而避害懷德而畏威身不離於闕庭令遠行於坳牧亦有不學而暗合於古未更而懸辨其事然其從政必問於遺訓而資於故實者也若夫





也臣何力之有因具上其狀帝用嘉焉霍公口無伐辭貌無得色朝髦庠齒歆以多之於是明威將軍行右衛郎將南使梁守忠忠武將軍行左羽林中郎將西使馮嘉秦右千牛長史北使張知古左驍衛中郎將兼鹽州刺史鹽州監牧使張景遵隴州別駕循武縣男東宮監牧韋衡都使判官果毅齊琛摠監韋績及五使長戶三萬一千人僉曰自開府庇我十三年矣畜有婉息人無乏匱克馱帝心莫匪嘉績且如停西南兩使六頓人夫藁穀計八十萬工圍石以息人約費其政一也納長戶隱田稅二萬五千石以儉私

肥公其政二也減太僕長支乳酪馬錢九千三百貫以空隙止散其政三也供軍筋膠十萬七千斤以收絹繕工其政四也蒔苜麥苜蓿一千九百頃以芟蓄禦冬其政五也使監官料舊給庫物新奏置本收分其利不喪正錢二萬五千貫以實府宜官其政六也賈死畜貯絹八萬往嚴道市僦僮千口以出滯足人其政七也五侯長戶數盈三萬墾田給食糧不外資以勤農卻輓其政八也敢問羣牧之事孰能加於此乎然則稱伐計功前典所貴上以美聖主擇才之得人下以贊忠臣受任之盡節末以道官屬承風之成

事竟以示後代昭前之令聞是四烈者不可廢也既而大君有命舊史書功吟詠瓌奇篆刻金石秦汧眇眇尚想非子之風魯野區區猶傳史克之頌試從此而觀彼夫何足以言哉頌曰

皇天考牧兮聖之君四十三萬兮馬爲羣塹汧渭兮垣隴阪飛黃阜兮昆蹄苑山崆峒兮水鳴咽泉噴玉兮草汗血聚如花兮散如雪性旣馴兮才亦絕維國家之大事駕時龍兮祭天地和鑾發兮文物備維皇帝之七德摠戎馬兮威萬國彩髦翻兮金介冑有霍公之掌政擇張氏之舊令天王駕兮仗黃麾太僕驂兮展輅儀舞月駟兮蹠重螭神倜儻兮能權奇騏驥溢野兮牛羊日多子孫榮位兮恩寵如何頌皇靈兮篆石鼓萬斯年兮羣玉府

岐邠涇寧四州八馬坊碑頌 并序 郤昂

垂象者玄上昭乎天殿天駟體玄者聖下列乎度人校人驥稱其德亦已遠矣願言馬之志曾有意乎粵若乾道爲良坤元利牝駒從渥水駿發中廬屈產貴其能鳴鴈門多其美春豈止宗生異北族施汧西而已哉自相土運其天機孫陽明其骨性秦贊泣其前後許衛詳其色毛悲伐在其股膺寒管議其脊齒麻

朝訾其頰胲女厲辨其目眸昔軒轅得之過寒門穆  
滿得之遊崑崙周王得之平東鄰漢帝得之定西秦  
我高祖得之四夷至我開元得之五輅備敢問毛蟲  
三百六十其誰力多於是乎夏殷以還經傳莫紀周  
制廢馬始頌厥官凡十二閑馬三千四百五十六始  
皇吞并寓內六萬騎之國馬盡歸秦漢武大脩佳兵  
崇飾戰馬至四十萬足是多乎哉自魏及隋天下騷  
動勞疲死轉數不足徵我有唐之新造國也於赤岸  
澤僅得牝牡三千匹命太僕張萬歲傍隴右馴字之  
四十年間孳婉成七十萬六千匹屬張氏替職圉師

敗宮馬之教駢日失其序逮開元初唯得二十四萬  
匹至十九年復成四十四萬匹今之盈縮亦不甚過  
上耕籍之明年命我邠公典斯馬政公齊其飲食視  
其良駑詹芻序涼綱惡去害天子以公有伯翳宜生  
之德爰錫土田日禪善養之功真堪宰相即召公入  
掌三事外司百揆調錐鼎實緝熙帝繇夷吾果理於  
高徯咎單謀暢於伊尹帝曰若予邠之後亮采惠疇  
僉曰元祐帝曰俞谷祐汝作小司空兼茲牧圉李公  
言成允令才實允宗恪居本朝能率大夏載習載步  
穉之秣之䟽穢鎮浮受劑聽訟匪燒匪剔斯馬斯材

荷天之寵未可涯也判官尚乘奉御長孫勗壽安尉  
賀蘭弼華陰主簿常與並心懸規鏡家韞賜書投刃  
靡全應機立斷侶昌門之驂乘行翼聖僊諧子況之  
能官坐登卿相有原迓浦非大而何雅所謂愷悌君  
子干祿愷悌信矣先是國家以岐山近甸幽土晚寒  
寧州壤其涇水流惡澤茂豐草地平鮮原當古公走  
馬之郊接非子犬丘之野度其四鏡分署八坊其五  
在岐其餘在三郡保樂第一蘇忠主之甘露第二劉  
義尹之南普潤第三田敬董之北普潤第四邵業監  
之岐陽第五李行守之太平第六馬慶尹之宜祿第

七魯歡領之安定第八李仙正之八人者或折衝禦  
侮或果毅昭戎射馭不違始終惟一又命朝散大夫  
都死揔監韋績揔以統之韋公敢行利物克壯遠猷  
悉心效官盡瘁事國口占諸吏躬親百爲攻特執駒  
禁蠹驅蠶撫蘇趣馬慰薦扈人陳損益以示其方明  
賞罰以防其慢立封準以程其課均衆寡以節其宜  
告之以畏威申之以誘掖曰善而筐蠹馭而瓔纒除  
而茲翦而蓋偕當循爾職制無使我馬玄黃抱公絕  
私匪怒伊教君子曰韋公之懷下如此欲辭福祿得  
乎人從話言馬賴調豢將蕃其類必謹其初故春祭

房星尊祖也夏祭先牧尚養也秋祭馬社敬乘也冬祭馬步存神也然後時其出入偵其肥羸一其種性殊其阜樞旌別淑慝無相奪倫試言夫名且曰獻狀其名則汗血山子桃駿綠耳金喙騰黃騶吾吉光蒲梢啓服野糜娥鹿白蟻雞斯蜚鴻毋兒遺風騶毳茲白鐵離項王之騅符主之騶相氏之騶晉侯之駮魏公絕影唐國驪驪劉之的顱呂之赤兔其狀則八尺之戎七尺之騊六尺之驕三尺之果下文臂花肩陰脣白顛掘腕作足昆蹄素懸縞形如練紫目如電有騅有騊有駮有騶有騏驎駮駮與羣驪駮亦分散如摘錦聚

若屯雲若廼審其容貌觀其尾鬣司其正骨鑑其回毛膺爲宜桀肘爲咸陽幹爲弗方背爲闕光水火又明城郭又張逸躍翹陸趨趨踞顧陞龐齧草降阿飲沱駮而翔駮而走如龍如鬼或寢或叱羈至特立仰鳴俯噴威儀變態不可談詳田事孔昭軍容大備有馬如此何憂乎戎由是判官長上果毅都尉成公雅貞尹承順兼諸寮吏及四郡齊人八方長戶因雜然相與謀曰自天子亭育我邠公覆露我李公司牧我韋公懷休我君臣同德其利博哉若不毛舉數事指敕大較雖隸圉之後將不食吾餘且保樂者隋石門

馬坊也其舊制褊狹多歷年所棟折榱摧墮牆垣墮  
其露先置在九成苑外土良藁美不迨苑中今茲數  
公得請于帝有詔令新保樂徙其露所云舩葺許用  
正錢今則量抽掌閑供飼國馬數內商權納其資課  
廻給工人計一歲省庫錢七百貫有奇以約財墾國  
其利一也甲令曰諸坊馬每年四月十一日停料野  
故今則以三月中候陽崖墳盈春草先長便停橐穀  
俾逐川原計一歲減菽粟四千石糞秆三萬圍後來  
年之用以隨時預蓄其利二也八坊管田一千二百  
三十餘頃析置一屯密邇農家悅來租墾王在京邑

則琬其生芻天旋洛師乃藏厥嘉實歲中收貯二萬  
五千石薪蒸倍之以爰吐盡地其利三也又緣馬所  
須羈絆翦刷黼鑠畚帚油藥灌劑之物艾黽滌除之  
器比年皆旁勞州縣長度公錢誅求無時不給其用  
寤以承弊人多懼憂今則權差夫丁率自采造成二  
萬六千五百三十石升枚具歲中省百姓供費三千  
貫以梘煩激惰其利四也內殿馬每年有瘠者病者  
老者疲者擇其不任者以頒諸坊則必餒之艾之行  
之節之俟其跳梁俟其充膺而後入之以內癯起廢  
其利五也是五者有仁人焉有王政焉何獨師古始

爲成憲則知從邠公之教可以阜從李公之法可以  
經從三判官之幹蠱可以事事無畱從韋公之警誓  
可以孜孜不怠古者有勞於國則紀之有功於人亦  
紀之里克賦在垆之頌燕公篆鹽牧之作吾從二史  
臣之後安敢墜於斯文其詞曰

天王乘玉兮德至山陵澤馬于島兮屢惟休徵君命  
臣力兮庶績其凝八坊載就兮畢來斯昇岐山之下  
兮出疇好涇水之傍兮多媿草繚垣墉兮積芻橐天  
馬來兮從東道羣紫燕兮駢綠蛇骨象奇兮歸帝家  
毛御風兮蹄踐雪舉籥雲兮低噴沙旣祀旣禱兮無  
裁害有馱有容兮真沛艾縞身朱鬣兮又白顛睨影  
長呼兮聲造天今安匹兮龍爲戎吾君馭兮壽千年

重校正唐文粹卷第二十二 終



唐文粹

卷三十三



重校正唐文粹卷第二十三

宋吳興姚 鉉纂  
明建武鄧 漢校

贊甲 摠六首

帝王一

唐武宗皇帝真容贊 李德裕

將相功臣四

凌煙閣二十二勲臣贊 溫 司空圖

自題寫真贊 裴度 張荊州畫贊 呂溫

庶官一

國家圖書館, NATIONAL CENTRAL LIBRARY, TAIWAN, R.O.C.

右丞徐公寫真贊 獨孤及

唐武宗皇帝真容贊 并序

李德裕

仁聖文武至神大孝皇帝御極之五載氣應天和德感人心朝廷四方咸一於政風雨時若螽螟歲息銷蓬宇爲休氣驅戎狄爲懷人北荒堅昆重譯而至厥有歷代憑沮弄兵陸梁韋顧旣伐夙沙自縛武功旣成休德昭明前古未聞百王莫致之事皆歲蕤於圖謀矣皇上以爲大禹敘九疇敬五事豈不曰貌恭則莊視明則正予欲作績傳照審其儀刑且夫聖人潛心於天以通神明先定其神而萬物理矣昔之訪具

茨期姑射在此而已況乎廣成之戒抱一玄元之去多欲予所貴道良爲是矣豈眩夫係風之言奇彼淖冰之術從僂佺之所珍遺堯舜之令名哉於是圖經素寫良金擬鑑形於止水若凝視於清鏡五彩旣彰穆穆煌煌居列仙之館近玄祖之光蓋以昭燕翼之謀顯丕承之德矣臣聞古之至聖必有奇相故黃熊之瑞應於龍體赤精之符協於圖表頎然而長文王所以王天下也體貌多奇漢高所以威海內也然則績事之微極於惟肖至於天光晬清日華明潤非可圖也庶髮髯焉末臣奉詔敢颺言曰

唐運中興天授大君軒耀其武堯煥其文北伐獫狁  
漠朔無氛西伏堅昆稽首稱臣殺生壺關盜起河汾  
沈機先物雄斷解紛克定羣慝竟全大勲八表旣寧  
萬機益勤爰命丕績載模天真崑閬仙岑峻極秋旻  
蓬瀛白日光照清晨涵育如天尊嚴若神輝赫綢緼  
爲龍爲雲聖作物覩禎祥以臻宣光乃孕虞熙載甄  
政建中和金聲玉振太階旣平廟器乃陳化下以德  
持盈以仁四瀆宗海衆星拱辰億萬斯年藻朗日新  
凌煙閣勲臣贊二十二首并序呂温

我二后受成命撫輿運軋坤軸撼乾樞鼓元氣而雷  
域中騰百川而雨天下雷收雨霽如再開闢蕩焉與  
太極同功貞觀十七年太宗以功成治定秉爲而不  
有之道讓德于祖考推勞于羣臣念匡濟於艱難感  
風雲於疇昔思所以攄之無窮乃詔有司擬其形容  
圖畫於凌煙閣者二十有四人蓋象乎二十四氣之  
佐天昭勲德也昔者舜以五臣致理周以十亂反正  
高祖以三傑作漢光武以二十八將中興若夫錯綜  
勲賢牢籠今古雄四代而高視者其惟聖唐乎至若  
唐昔公劉渝公之倫探元符建帝圖首戴神堯舉晉  
陽而活天下此則大禹之拯溺也魏鄭公以致君爲

已任諫若不及蹇蹇左右秉心宣猷此則咎繇之颺  
言也虞求興糾合羣儒旁求百代明備王禮克諧帝  
樂使我大國煥乎其有文章此則夷夔之制作也長  
孫趙公舉大義除二兇安宗廟定社稷以振我不赫  
無疆之休此則周公之匡救也英衛受天勇智雄武  
佐聖鼓行海內麾定四方此則太公之鷹揚也房杜  
玄機朗識並運帷幄神發響效謨成天功此則蕭何  
之指蹤也子房之決勝也尉遲秦程剛毅木訥氣鎮  
三軍力崩大敵匹馬孤劔爲王前驅此則吳漢之樸  
忠賈復之雄勇也其餘皆棖棟殊材黼黻異制傳諸

古烈罔有慙德皇王之際於斯爲盛其始也文爲經  
武爲緯智斯作忠斯述其末也大不信小不逼退者  
全來者達控而縱之使自用之推而引之使自盡之  
不設籠檻以觀遼廓之致不頓韁鎖以極權奇之變  
執一德而衆力展懸大信而羣情竭高祖聚之以義  
太宗用之以道高宗終之以仁傳聖萬代享其功利  
此非盛歟昔陸機袁宏爲晉人而歌功於漢魏作者  
猶或稱之況乎遊聖代觀國光目睨凌煙而頌聲不  
作某不揣賤劣有斐然之志輒盡所蓄各爲讚一章  
上以見王業之艱難中以明聖賢之相須次以朗前

哲之光韻末以聳後人之誠節侯君集張亮負勲跋扈自陷大逆敢沒其名用彰天刑使伐勞懷貳者懼春秋之義異姓爲後故以河間元王爲贊首云

河間元王孝恭

太極構天本由一氣大人創業資我族類堂堂河間仁勇是經適駿有聲爲唐宗英暴隋天亡羣盜猖狂我伐用張時爲哲王武有烈光爲爪翼肺腸經綸八方自南徂東晏海澄江平蕭銑輔以使父兄帝天下化家爲邦用竭爾力寵臻其極言不伐色不德以遜以默柔嘉惟則佐高祖建大勳如周且奭與太宗守大成

如漢間平宜君宜王盤石無疆

房梁公玄齡

梁公先覺龍臥待君長彗流光掃天布新義師雷興公躍其麟杖策千里來謁帝闈婉婉梁公實懿實聰實光實融羽義翼忠若鸞若鴻大風動地儒服從容靜運曾中馳張折衝左右太宗夷屯廓蒙定高祖功功告武成翊開太平我雖忘勞時靡有爭網羅遺賢推較羣英玉不韜輝蘭無沈馨飛鴻出冥振鷺在庭濟濟多士太宗以寧公無事矣闕袞有補惟仲山甫經營四方方叔邵虎大邦鈞軸至則委汝閑居台輔

撫默自處亦莫敢侮高朗令終嗚呼梁公

杜葉公如晦

穆穆葉公竒姿粹靈蘊元和氣為大國楨乘時恢能

唐室大開故人相攜公與房梁公同有匡濟之志也直上太階更為

陰陽迭作日月佐明四海贊育萬物王度是欽如玉

如金德音愔愔萬有千古末稱房杜如周申甫

魏鄭公徵

堂堂魏公崇節大志喬榦直聳摩天自致遭風雲時

得霸王器一言委質有死無二撫我則后各盡其志

嘗事李密沈浮變通龍戰既息皇建其極俾補衮職

其繩則直諤諤疑疑危言正色保太宗德弼違替否

日月不蝕黜漢霸雜行周王道入或有言秉德不撓

與封德彝禮興樂崇德合道豐保合太和昭明有融起

四年中復三代風言出化成神哉厥功尹躬佐商有

耻于湯公以其志匡飾聖唐為唐宗臣致唐無疆末

式萬邦

長孫趙公無忌

趙國之先發祥朔土乃祖乃父受天之祐為天下母

有子而賢為唐宣輔聖賢同氣千載一覩不顯趙公

允文允武克忠克仁實有大勲高祖受命太宗歸尊

翼翼乾乾恪居于藩羣孽亂嗣爭窺神器鴻業將墜  
 公揭大義一匡天地人到于今家受其賜帝將傳聖  
 爰有顧命汝忠汝誠莫與汝京與我聖子守唐太平  
 公相高宗有太宗遺風刑措財豐八荒來同和氣大  
 融妖星襲月禍起中宮公將正之以王帝躬武氏謀位公以  
 勳力屈羣邪誠阻天聰黜非其尤令問無窮

唐莒公儉

歲寒陰凝冰雪皚皚有鳥擇木先陽春來誰與莒公  
 王佐之材間運未開登潛龍臺代萬姓請命與天為  
 媒扶龍而興振起雲雷權輿帝圖經始唐基始覆一  
 簣勳焉巍巍易失者時難知惟幾知幾其神莒公元  
 勳

劉渝公政會

河出崑崙來潤中夏連山合沓橫擁其派巨靈勃然  
 手擎太華決流東注公並造化粵我聖唐將舉晉陽  
 帝命是將往拯溺于四方亦既在旆亦既秉鉞強兇  
 當路王威高居雅拒不得發渝公慷慨感義激節用奇制  
 變大事立決雷奮霆越天衢八達則莫我敢遏如巨  
 靈破山河勢始豁赫矣渝公與神齊烈跡如仙掌炯  
 炯不滅

李衛公靖

有隋之末羣盜熾藝帝怒震發五星從太白煥照參  
 野將有聖人兵定天下金精下射猛毅感激李公矯  
 矯從此奮跡躍于中原王者則獲壯士不死初公不  
利於我  
帝欲戮之壯其言唐威載赫帝曰汝傑致天之罰手  
 而免壯士公自稱唐威載赫帝曰汝傑致天之罰手  
 付金錢俾注式過不庭則殺如颺發發如火烈烈摧  
 枯爍雪應鼓如截遠若荆巫險若江湖強若匈奴莫  
 不率從莫不震恭車書混同氛稜蕩空衛侯之功功  
 則維何威明惠和策勇駕智長驅仁義仁義曠蕩帝  
 王之將萬古曷瞻鐵山鐵山積石山嶽嶽詔築嶽胡象

李英公勣

橫流莫極大亂無象英公傑出應運為將與楚楚霸  
 與漢漢王天時人事隨我所向長蛇縱蝨狂東據河  
 洛焚焚封豕建來濟同惡號吼連應如雷如霆萬里  
 震驚時維英公讚我太宗斬豕以鉞取蛇于穴羣穢  
 殄滅乃定九鼎乃開明堂奄有大邦金甲同光告成  
 于王太宗獻捷于高祖與勣  
俱探金甲為上下將皇業用昌帝命英公比  
 伐獫狁雷鼓殷殷旄頭幾殞掃雲黑山布唐陽春五  
 原草綠不見南牧島夷未庭天子親征其鋒維英莫  
 拒莫抗是震是蕩破東海浪天下既和解鞍投戈袞



服委他華髮皤皤終始三朝無玷可磨

劉夔公弘基

夔公崢嶸金虎之精應時而生與運俱行  
愨帝元戎震唐天聲瞋目張膽前無金賊  
別建龍節中分虎旅啓行萬里乘氣一  
鼓劔揮雷霆旆卷風雨先馳咸陽鎮定  
天府天府既定唐集大命入揚王庭出  
權兵柄東伐獫狁朔風不競徂征島夷  
東海如鏡義始忠卒元動之盛

長孫邳公順德

泰山未明雷鬱幽崖日觀赫開舒爲丹霞  
昔我太宗賢傑潛屯帝出于震爛其盈門  
邳公炳焉實耀其間功參造物詠協先天  
執爰前驅捧轂南轅以勞以舊佐命之元

虞永興公世南

英英永興華德素行以文富國以道佐命  
天下既定爲唐儒宗東觀石渠始生古風  
乘精繹思假道書圃驅馳百代出入三古  
問義黃心聽堯舜語歸來帝側獻可替否  
帝告永興與鴻碩之倫闡六籍三墳建樂  
章禮文先師是宗於廓辟雍辟雍沈沈天  
子所臨或弦或歌講古述今其從八千纓  
弁森森獬豸羗髮或

誅德音羽林孤兒亦垂青襟洋洋聲教無遠不洎日月所照皆成文字鬱開古始掃蕩澆季實我羣儒成太宗之志英英永興宜曰文懿

尉遲鄂公敬德

先先鄂公百鍊龍泉沈翳未宣氣衝斗間佩非其人初事宋躍入大川神武獲焉提之上天天地之內指

金剛

麾無前熊威虎力隱若敵國剛毅木訥安劉必勃武德之屯手拔禍根掃除氛昏捧出日月耀于天門功成名遂高謝戎事烈烈猛志化為和氣深地高堂頤性保命屑瓊飲露靜奏清商商為臣勵事君鄂公之

志之仁

貞觀後公不交人事常鍊氣服食奏清商樂以自奉

蕭宋公瑀

隋氏不君忠賢莫用桐生朝陽有集惟鳳捨彼頽厦鬱為新棟路車玄袞開國有宋武德之暮羣孽內蠹巍巍宋公聳節高步不吐不茹不來不去屹屹中立為天一柱從容而言社稷遂安持誠秉忠光輔二君激濁揚清欲人如身道至廣莫我敢羣境至大不容纖塵雪山倚空冰壑照人耿介絕倫為唐貞臣

張郟公公瑾

有倬郟公仡仡而貞先先而仁實太宗信臣有宗守

藩內難未夷圖之則安捨之則危帝臨安危機以懼以疑以著爲先知是筮是咨郟公嶷然排闥折著抗憤正詞用人事定天意身爲元龜不知不識順義之則以定社稷郟公之力公之云亡帝念其勤若痛在身天懷發中哭不避辰君臣之間亶古未聞

屈突蔣公通

五運相推土火革期隋化爲唐忠臣不知猶驅義徒奮拒王師指心誓天摩頸待時人歸有德四海皆叛春日滿川流冰未伴亡家徇國方寸不亂力屈勢窮排空落翰東南慟哭聲盡魂斷仗忠就擒萬國瞻漢

帝曰爾通古之烈士孝於其親誰不欲子俾侯于蔣授以師紀感恩不死宜力如彼佐唐扶隋名教之美

高申公士廉

維嶽降神佐唐生申忠貞自天孝友如春德爲邦基仁厚人倫肅肅雍雍真王者臣慶因歸妹光延天配

文懿皇后公之同出也

婚媾之中雲龍潛會建公南海廓我無

外讚我撥亂弼文開泰遏彼庸蜀荐鍾澆李文翁之化若掃于地申公攸徂有教無類父子兄弟望風相死勃興儒雅大復禮義西南頌聲到今不墜名登元勳理冠羣吏全材大器於鑠厥懿

殷鄭公開山

温温殷公初若懦夫銅印試吏褒衣爲儒大風驅雲  
忽與之俱遭逢真宰參造化謨天地旣闢厥功有赫  
從王龔行佐帝光宅遠展驥足高揮鳳翮以末終譽  
垂于竹帛

秦胡公叔寶

洛汭之役龍戰未決我師與王世充陣于九曲秦公應變臨陣電  
拔銳氣盡來我盈彼竭成敗反掌存亡奄忽虎來風  
壯鼉轉山沒遂作心膂爰從討伐崩圍陷陣火迸冰  
裂翕如鶚聲縱若鯨突功成國定萬古壯骨

程盧公知節

盧公倬然動軼幾先轉禍爲福與秦胡公攀龍上天降于九曲攀龍上天  
續翻鵬翼積風乃聳栢栢將軍大敵則勇雷崩山谷  
貔虎頓伏颺倒溟波鯨鯢蹉跎見危而進當死不讓  
于城三朝身老氣壯

段褒公志玄

褒公虎臣先運而臻謁帝太原許唐與身擁劔駕氣  
騰風躍雲積忠累仁光有厥勲建旄北伐細柳宵屯  
風謐霜凝嚴扃達晨天子之使駐車軍門軍屯肅章乃外壁門  
以夜不納制使安衆秉威此真將軍侁侁相相克壯有聞

許譙公紹

羣勳相食血流中原譙公夷陵豺虎為鄰列境連城  
火炎煙昏皎其一邦如玉不焚三光忽開萬象皆新  
誰有天下平生故人公與高引忠歸誠豹變蠖伸金  
石之契移為君臣弈弈煌煌為龍為光元戎啓行大  
旆央央式逼大江奄征南方恩斯勤斯兩不可忘

三賢贊

并序

司空圖

隋大業間房公李公魏公同師文中子嘗謂其徒曰  
玄齡也志而密靖也惠而斷徵也直而遂俾其遭時  
致力必濟謨庸厥後果然宜有贊激云

三賢志同夙尚儒風以植公忠出遇太宗諷議從容  
謀厥羣雄君勞臣惕荒夷阻關百千年社稷

自題寫真贊

裴度

爾才不長爾貌不揚胡為將胡為相一片靈臺丹青  
莫狀

張荊州畫贊

并序

呂溫

中書令始興文獻公有唐鯁亮之臣也開元二十二  
年玄宗春秋高矣謂太平自致頗易天下綜覈稍怠  
推納寤廣若君子小人摩肩于朝直聲遂寢邪氣始  
勝中興之業衰焉公於是以身任抗

言而無所適乘大節而不可奪小必諫大必諍攀  
而天誓已雷震之或不寧不止日月幾蝕卻爲  
不明亮而冠之不致遠視羣賢倚賴天下仰望凜凜  
手千載之望矣不虞天將啓幽薊之禍俾姦臣乘聲  
以速致戎許成難事聖不能保確我公衮寘于侯服  
身雖遠而諫愈切道既塞而誠彌堅憂而不怨終老  
南國於武功業見乎變而其變有二在否則逼在秦  
則窮開元初天子新出艱難久貢荒政樂與群下勸  
精政理於是手有否極之變遂未坐而乘之舉爲時  
要領中上急天光照身宇宙在手勢若舟楫相得當

洪流而鼓迅風崇朝千里不足怪也開元末天子倦  
于勤而安其安高視穆清肅然大滿於是乎有泰極  
之變荊州起而扶之舉爲時害動拂上欲日與讒黨  
抗行于交戟之中勢若微陽戰陰衝密雲而吐丹氣  
歛耀而滅又何難乎所痛者逢一時事一聖踐其跡  
執其柄而有可有不可有成有不成况乎差池草茅  
沈落光耀者復何言哉復何言哉曹谿沙門靈徹雖  
脫離世務而猶好正直攜其圖像因以示余觀而感  
之仍作贊曰

唐有棟臣往矣其貌世傳遺像以覺後學德容恢異

天骨峻擢波澄東溟日照泰嶽具瞻崇崇起敬起忠  
貌與神會凜然生風氣蘊逆鱗色形匪躬當時曲直  
如在胷中鯤鱗初脫激海以化羊角中頽摩天而下  
無喜無愠亦如斯畫嗚呼爲臣儆爾夙夜

尚書右丞徐公寫真圖贊

并序

獨孤及

侍御史韓公至清以學藝書畫之美聞于天下辛丑  
歲三月以王事靡盬館于豫章與前尚書右丞徐公  
同舍於惠明寺之淨室嘗以暇日裂素灑翰畫徐公  
之貌陳於公之座隅而美目方口和氣秀骨毫釐無  
差若分形於鏡入自外者或欲擎跽揖讓俯僂拜謁  
不知其畫也衆君子嗟歎之不足則言以讚其美某  
亦繼唱于後哲匠運思天姿是具假之筆精實以神  
遇居然成象豁若披霧瞻仰神鋒如窺武庫婉婉高  
識昂昂獨步絕頂孤松空波白鷺不犯之色匪躬之  
故孰知其化亦在毫素

重校正唐文粹卷第二十三終



國家圖書館, NATIONAL CENTRAL LIBRARY, TAIWAN, R.O.C.



重校正唐文粹卷第二十四

宋吳興姚 鉉纂  
明建武鄧 漢校

贊乙 摠二十八首

孝子一

二孝贊 李華

古賢四

四皓贊 梁肅

四皓後贊 李華

南山四皓畫圖贊 韋渠牟

四公子贊 潘存實

名臣一

國家圖書館, NATIONAL CENTRAL LIBRARY, TAIWAN, R.O.C.

鳳閣王侍郎傳論贊

浮圖十一

三如來贊

梁肅

西方淨土變相贊

李白

藍田法池寺二法堂贊

張說

誌公畫贊

李白

達磨和尚法門義贊

釋皎然

天台和尚法門義贊

能秀二祖贊

誌公贊

唐大通和尚法門義贊

唐鶴林和尚法門義贊

李居士贊

李白

圖畫六

龍馬圖贊

柳宗元

騶虞畫贊

白居易

貍屏贊

畫雕贊

怪松圖贊

陸龜蒙

金鄉薛少府廳畫鶴贊

鷺鳥一

雙白鷹贊

蘇頌

絕藝一

裴旻將軍射虎圖贊

李翰

雅樂二

霹靂琴贊

柳宗元

琴贊

李白

橋梁一

蒲津橋贊 張說

二孝贊 并序

李華

靈武二孝曰侯知道程居羅目不覩朝廷之容耳不聞韶夏之聲足不登齊魯之境所見戎馬旃裘參於夷狄而能生養以孝沒奉以哀穿壙起墳出於身力鄉人助之者哭而反之廬於冢次號泣無節侯氏七年矣程氏三年矣根於天性陶我孝理其至乎哉埃垢積首草生髮間每大漠晨空連山夜寂人煙四絕虎豹與鄰擁墳椎膺聲氣咽塞下入九泉上徹九天背爛心朽皮枯節變草木先秋而凋落景氣不時而

凝閉殊鳥異獸助之悲號萬物有極此哀無窮大哉二子能以孝終始乎語曰孝如曾參不忍離其親生既不忍歿忍離之哉二子之孝過於曾氏矣昔吳起恐與母盟陳湯恐匿父喪起謀復楚霸而戮死湯功釋漢耻而囚廢神道昭昭若何無報九州之衆誰非人子踐霜露者聞風未懷士有感一諾一顧猶或與之生死嘉一草一木猶或爲之歌詠而況百行之宗終天之感乎華奉使朔陲欲親往弔焉屬河凌絕渡願言不果憑軾隔川寄聲二孝同爲贊一章敢旌善人以附惇史其文曰

厥初生人有君有親孝於親者爲子忠於君者爲臣  
兆自天命降成人倫背死不義忘生不仁愚及知就  
爲之禮文禮文不能節其哀繫道德之元純至哉侯  
氏創鉅病殷手足胼胝成此高墳蔬果爲奠茅蒲爲  
茵其奉也敬其生也貧大漠黃沙空山白雲柏庭旣  
夕松路未晨寇戎接境豺狼成羣夜黑飈動如臨鬼  
神哭無常聲迴徹蒼旻風雨漂搖支體鱗皴色慘莪  
蒿聲酸棘薪苴斬三年爾獨終身邑子程生其哀也  
均顧後絕配瞻前無鄰冬十一月河冰塞津吾將弔  
之其路無因寄誠斯文揮涕河濱

四皓贊

并序

梁肅

道可佐皇而隘於帝治是以崆峒箕山之長揖於軒  
堯也德宜輔王而偶生霸世則四皓之所以晦明於  
漢氏也噫周道絕而王澤涸秦短世而漢雜興六合  
披攘兵不暇戢則四公軒軒然鴻飛于明時也天下  
大寶一人攸繫苟蔑嫡崇庶則亂是用長而公僂僂  
然俯定儲后權也處則以時出則以權時以全已之  
道權以定天下之器得非知幾者歟易謂知幾其神  
乎四公體之故曰時合道合時塞道塞生非其時與  
道消息四公之謂歟贊曰

秦失其鹿豪傑並逐鸞鳳何依白雲深谷英英南山  
采采紫芝漢以劔起吾誰與歸栖心化元澹泊無爲  
禮物雖至先生默而惟彼貞石確不可轉儲皇不安  
我德用顯大君是驚惠位是寧四公屈身天下和平  
戈者何思鴻飛冥冥

南山四皓畫圖贊

并序

韋渠牟

故人清河房茂長刺商山成簡靜之化曰隱居之類  
也畫茲圖以貺予緬乎沉吟想似之不足故爲文以  
懿之詞曰

煥煥煌煌爲珪爲璋孰光乎不耀之光幽幽深深爲  
山爲林孰繫乎不繫之心足知乎虛室生白玄門不  
關流水去住清風往還豈比夫稷契在世巢由在山  
一物有累兩心不閑者哉閑之謂何簪裾薜蘿本不  
干我豈云其他熙熙忻忻與時爲春匡漢避秦惟茲  
四人于德之鄰不孤其身于澗之濱不迷其津繪事  
旣素孰知其故想像儀形念茲丹青曄曄紫芝深谷  
逶迤俛仰今古空林住時鳳豈無德鸞皆有羣出處  
語默商山白雲

四皓後贊

李華

時濁代危賢人去之商洛深山鸞鳳潛飛漢以霸興

皇王道衰玉帛雖至先生不歸吾非固然可動而起  
瘡眉皓髮來護太子至尊動容奪嫡心已四賢暫屈  
天下定矣返駕南山白雲千里

四公子贊 并序

潘存實

四君當齊楚趙魏之盛門客三千人聞者孰不慕之  
有未達則孰不曰一朝富且貴必然嗚呼自四君歿  
千載之間豈無貴於四君者豈無富於四君者而然  
者其誰既富貴則曰彼四子徒沽名爾三千之人何  
為哉悲夫人之貴也為身四君之貴也為人富貴皆  
知可及也而富貴之心與貧賤之心不相負者愚則  
未見其及也贊曰

四人為身萬二千人為耳目四人為梁萬二千人為  
榱桷有危可平有死可生豈彼威憑寔惟義爭嗟乎  
人之家或財不自與心不自是妻不睦夫父不慈子  
而況乎萬二千人懿哉恨日不覩此

鳳閣王侍郎傳論贊

并序

李翰

論曰王氏之先蓋出於有周自后稷公劉迨乎大王  
王季以至文武成康累聖重光以成王業故能上世  
三十十年七百天所命也下及靈王厥德雖衰而天  
命未改有太子晉者登仙于伊洛之間其後代子孫

遂稱爲王氏考其綿系不亦遠乎旣而姬氏運窮戰國蜂起有錯爲魏將翦爲秦將咸以武功翊扶霸業宏謀遠略二國賴焉自秦至漢有吉有駿爲漢代名賢自漢至晉有覽有祥爲晉室公輔時徐州刺史呂虔檄祥爲別駕虔有佩刀工者相之以爲三公之器虔謂祥曰苟非其人刀或爲害卿有公輔之量故以相與祥固辭不獲而後受之祥在魏爲司空太尉封睢陵侯晉武帝踐祚拜太保爵爲公年八十餘賜凡杖不朝爲國元老祥臨薨以佩刀授其弟覽曰汝後必興足稱此刀覽拜光祿大夫封卽丘子門施行馬

覽生撫軍長史裁裁生丞相始興文獻公導匡輔中興遷都建業元帝倚以宰衡之任而王氏盛於江左矣其正緒也則悅洽珣珉以弘雅清亮重於時其傍枝也則渾戎衍經以曠達夷坦高於物若乃器宇崇邈風鑿昭朗則宋侍中左光祿大夫開府儀同三司特進豫寧文侯其人也忠肅恭懿宣慈惠和則宋侍中金紫光祿大夫開府豫寧忠敏侯其人也開物成務緯地經天則齊中書監尚書令大尉南昌文獻公其人也廉正澄絜恬虛簡潤則梁侍中金紫光祿大夫中書令南昌安侯其人也美幹英姿通機敏藝則

梁侍中金紫光祿大夫五兵尚書南昌章侯其人也  
博學高才鴻筆麗藻則周內史太子太保驃騎將軍  
開府儀同三司司空司徒石泉康公其人也  
有典有則如珪如璋則隋安都郡大守石泉侯其人也  
道韻清穆德徽光劭則太子舍人荆王府司馬皇朝贈魏  
州刺史其人也其餘枝分葉散岳峙川流孝範忠規  
仁聲義烈女嬪帝子男尚王姬公侯保輔之尊令僕  
卿尹之貴紐龜鳴玉紫蓋朱軒赫奕蟬聯繽紛菴藹  
市朝亟改而無替舟壑驟遷而不易衣冠禮樂百代  
傳之而比肩人物風流四海望之而延頸豈不美哉

雖復魯三桓之子孫鄭七穆之宗族晉之欒范齊之  
國高張氏之七葉貂蟬楊家之四世台衮石奮石慶  
恭睿重規胡質胡威清廉疊軌父子儒學栢榮與栢  
郁相承兄弟文章陸機與陸雲齊舉未足以延茲家  
範麗我門輝所謂積善之家必有餘慶盛德必有百  
世之祀者也善乎郭景純之言淮水絕王氏滅此非  
其效歟石泉公承積德之基挺清和之氣髫鬣之歲  
便能竭力以事親其性純篤率由而至精神朗晤特  
異常童好學讀書略無懈倦常研味經史雖寢食有  
所不遑纔及成童已爲博達朋侶推薦束髮而就列



馬歷仕州郡咸以材能底績既以賢良文學舉又以夙行公方進遂乃昇臺府拜卿僕三典名嶽一佐神州始學之今得而行之以明察禦姦豪以慈和撫孤弱以謹靖成公務以清白杜私求珠玉非所寶脂膏不能潤故能所廣者紀不令而行千里應其言百姓歸其德所謂愷悌君子人之父母者也及其翔鳳池執螭劍出納王命弼諧帝猷理在將順怡然而奉旨事當進色侃然而犯鱗常欲興禮制樂簡刑寬政獎儒術抑吏道正風俗厚人倫乃遽瑗之忠誠史魚之端操孟公綽之不欲季文子之無私羊興祖之衣惟

葛袍公孫弘之食惟粟飯陳寵之奏藁咸削孔光之溫樹不言我之行事立名殆出於數公之右矣由是特爲上所親倚常以忠賢許之其好古博雅述作無倦遊心於千載之表騁思於九流之域雖堆按盈机積訟充庭汗簡懷鈇晷刻無捨所莅之職由中及外或考其事或相厥土博採前志旁求故實輒加撰錄無或闕遺至以祖德家聲前言往行追述編紀動成部帙有忠孝之道焉有禮義之規焉有經邦之則焉有正家之訓焉固可以詒厥孫謀播乎長世者也易曰君子體仁足以長人嘉會足以合禮利物足以和

義貞固足以幹事又曰君子進德脩業忠信所以進德也脩辭立其誠所以居業也又曰君子學以聚之問以辨之寬以居之仁以行之詩曰瑟兮僖兮赫兮烜兮有斐君子終不可諉兮道盛德至善人所不能忘也又曰樂只君子邦家之基又曰嘉樂君子顯顯令德宜民宜人受祿于天若石泉公者可謂備君子之德矣其爲聖朝輔佐受天之祿也宜哉贊曰

仙緒山賓靈液流津積德累仁生賢降神孝以事親忠以爲臣履道正身秉國之鈞君子哉若人上德哉若人

三如來畫像贊

并序

梁肅

法王之身有三曰法曰報曰應報身從無邊功德生應身依無邊衆生生法身從如如無有生分別說三其極一貫原夫大道之體離一切相是其本也積大德施大惠合大道成大身是其報也出入十界隨所利見如水月鏡是其應也自因至果故不得不有其報病一切病故不得不行其應應亦名也報亦名也名乎哉其實相之賓乎經云觀身實相觀佛亦然嘗試思之以爲衆生蓋及佛者也是三相在佛爲三德在凡爲三障一者生死生死即空寂空寂即法身也

二者煩惱煩惱即智慧智慧即報身也三者結業結業即解脫解脫即應身也三德成於悟三障成於迷迷而不復也遂自絕於佛乘哀哉予嘗齋心命工裂素作繪聖德之形容可舉目而見見而後思思而後知至知至之路蓋由是矣瞻仰之不足遂爲之贊庶觀者有以三如來不在心外不可以有無心取大哉法體體如虛空不始不終不垢不淨不邊不中是謂涅槃是謂法身諸佛性海是無上正真

右贊毗盧遮那佛

妙哉報體體法而大白清淨功德色無礙德色無礙成實智慧範圍法界盡未來際

右贊盧舍那佛

神哉化功萬化无方休有烈光以百億色身播百億國土啓權顯實或默或語示我寂滅雙林之下

右贊釋迦牟尼佛

三聖一身本无有異恒沙諸佛其道一致衆生唯妄竟妄斯至懸象著明用鑒心地

右摠贊

金銀泥畫西方淨土變相贊并李 白

我聞金方之西日没之所去中華十萬億刹有極樂

世界焉彼國之佛身長六十萬億恒沙由旬眉間白毫向右宛轉如五須彌山目光清白若四大海水端坐說法湛然常存沼明金沙岸列珍樹欄楯彌覆羅網周張車璫璫瓊瑤爲樓殿之飾玻璃馬腦耀階砌之榮皆諸佛所證無虛言者金銀泥畫西方淨土變相蓋馮翊郡太夫人奉爲亡夫湖州刺史韋公之所建也夫人蘊冰玉之清敷聖善之訓伉儷義大希拯拔於幽塗父子恩深用薰脩於景福誓捨珍物購求名工圖金創瑞繪銀設像八功德水波動青蓮之池七寶香花光映黃金之地清風所拂如生五音百千妙

樂咸疑動作若已發願及未發願若已當生及未當生精念七日必生其國功德罔極酌而難名贊曰  
向西日沒處遙瞻大悲顏目淨碧海木身光紫金山  
勤念必往生是故稱極樂珠網珍寶樹天花散香閣  
圖畫了在眼願託彼道場以此功德海冥祐爲舟梁  
八十一劫罪如風掃輕霜諦觀無量壽長放玉毫光

藍田法池寺二法堂贊 并序 張說

法池西三歸院二法堂茲寺長老初上禪師所造也  
禪師俗姓彭名知至性篤孝執親之喪七日不食微  
言密行志道探玄究易老莊太一之旨善正書擅鍾

王品格其點畫宛秀毫縷必見如折槁荷磨文石筋理灑颯固非人力之所致也中朝名士山數高尚法流開勝遠近慕焉及晚年專意於禪頌生平藝業脫若遺塵矣常歎曰帝王父母許我出家雨露生成恩惟一揆依如來教創是功德萬一乎獻福二宮潛祐七祖將與一切咸登道場於是三歸堂以長安元年辛丑子月望日癸未立善法堂以開元元年癸丑丑月望日戊辰建禪師母弟仁琬弟子沙門啓疑及沙彌令哲左右斯業實有力焉而作贊曰

三歸堂贊

敬告諸佛子一心清淨觀欲求正真道當從信根入是佛虛空相是法微妙光定慧不相離是僧和合義人空法亦空二空亦復空住心三空寶是名三歸處

善法堂贊

至哉初上人建立善法堂彩翠三世佛莊嚴清淨眼能運無礙心普入於一切見若不染色知若不取識是名真實見亦名解脫知佛觀離生滅諸法等如是

誌公畫贊

李白

水中之月了不可取虛空其心寥廓無主錦幪鳥爪獨行絕侶刀齊尺梁扇迷陳語丹青聖容去住無所

六贊

釋皎然

達磨和尚法門義贊

我師西來傳乎真訣大輪當路小乘亡轍冥冥世人  
初見日月權跡有歸光雲不滅

天台和尚法門義贊

我立三觀即假而真如何果外強欲明因萬象之性  
空江月輪以此江月還名法身

能秀二祖贊

二公之心如月如日四方無雲當空而出三乘同軌  
萬法斯一南北分宗工言之失

誌公贊

大動之地我安其中高景無氛靈鶴在空出生死地  
隨物有終釐形駭俗借績開蒙常攜刀尺精意誰通

唐大通和尚法門義贊

觀淨之筌斯言不住四色蓮花白花爲喻應知離相  
或未圓通吾師惠心雲開天空

唐鶴林和尚法門義贊

真見之體知而不知性猶無主禪何有支我本圓寂  
湛而不移聿來化人慈力所爲

李居士

李白

至人之心如鏡中影揮斥萬變動不離靜彼質我斤  
揮風是騁了物無二皆為匠郢吾族賢老名喧寫真  
貌圖粉績生為垢塵從白得衰與天為鄰儼然不語  
長存此身

龍馬圖贊 并序

柳宗元

始吾聞明皇帝在位靈昌郡得異馬于河而莫知其  
形好事者涿人盧遵以其圖來示余其狀龍鱗虺尾  
拳髦環目肉鬣馬之靈怪有是邪居帝閑幾二十年  
從封禪郊籍鳴和鑾者數十事遇亂帝西幸至咸陽  
西入渭水化龍沫去不知所終且其來也宜于時其

去也存其神是全德也既觀其形不可以不贊

靈和粹異孕至神兮保尾童鬣疏紫鱗兮巍然特出  
瑞聖人兮理平和樂百禮陳兮鳴鑾在御大路遵兮  
世危道悖還吾真兮哀鳴延首渭水濱兮沛馬潛沫  
旋齋淪兮淵居海遊靈無鄰兮出處孔時類至仁兮  
嗟爾眾類孰是倫兮進昏死亂沾厥身兮匪馬之慕  
吾誰親兮贊之斯圖宜世珍兮

騶虞畫贊 并序

白居易

騶虞仁瑞之獸也其所感所食暨形狀質文孫氏瑞  
應圖具載其事元和元年夏有以騶虞圖贈予者予

愛其外猛而威內仁而信又嗟曠代不覲引筆讚之  
詞曰

孟山有獸仁心毛質不踐生芻不食生物有道則見  
非時不出三季已還退藏於密我聞其名徵之於書  
不識其形得之於圖白質黑文視首虎軀是邪非邪  
孰知之乎已矣夫已矣夫前不見其往者後不見其  
來者于嗟乎騶虞

獬屏贊

并序

白居易

獬者象鼻犀目牛尾虎足生南方山谷中寢其皮辟  
溫圖其形辟邪予舊病頭風每寢息常以小屏衛其  
首適遇畫工偶令寫之按山海經此獸食鐵與銅不  
食他物因有所感遂為贊曰

邈哉奇獸生于南國其名曰獬非鐵不食昔在上古  
人心忠質征伐教令自天子出劔戟省用銅鐵羨溢  
獬當是時飽食終日三代以降王法不一鑠鐵為兵  
範銅為佛佛像日益兵刃日滋何山不剗何谷不墮  
銖銅寸鐵罔有孑遺悲哉彼獬無乃餒而嗚呼匪獬  
之悲惟時之悲

畫鵬贊

并序

白居易

壽安令白昊予宗兄也得丹青之妙傳寫之要毛羣



羽族尤是所長長慶元年以畫鷗貺予予愛之因題  
贊云

鷲禽之英黑鷗丁丁鉤綴八爪劔插六翎想入心匠  
寫從筆精不殫不鷗一日而成軒然將飛戛然欲鳴  
毛動骨活神來著形始知造物不必宿冥但獲天機  
則與化爭韓幹之馬籍籍知名薛稷之鶴翩翩有聲  
研工覈能較真鬪靈豈無他人不如我兄

怪松圖贊

并序

陸龜蒙

有道人自天台來示余怪松圖披之甚駭人目根盤  
于巖穴之內輪囷逼側而上身大數圍而高不四五

尺礪礪然感縮然榦不暇枝枝不暇葉有若龍攀虎  
跛壯士囚縛之狀道人曰是何物怪如是耶子能辯  
之乎余曰草木之生安有怪耶苟肥瘠得於中寒暑  
均於外不爲物所凌折未有不挺而茂者也矧松栢  
乎今不幸出於巖穴之內脞脆者則磔然其牙伏死  
其下矣何自奮之能爲是松也雖稚氣初折而正性  
不辱及其壯也力與石鬪乘陽之威悲已之軋拔而  
將升卒不勝其壓擁勇鬱遏空憤激訐然後大醜彰  
於形質天下指之爲怪木吁豈異人乎哉天之賦才  
之盛者蚤不得用於世則伏而不舒薰蒸沉酣日進

其道權擠勢奪卒不勝其阨號呼呶拏發越赴訴然後大奇出於文彩天下之指爲怪民嗚呼木病而後怪不怪不能圖其具文病而後奇不奇不能駭於俗非始不幸而終幸者邪道人曰然爲我贊之贊曰松生蔭隘巖獄穴械病乎不快卒以爲怪擁腫支離神羞鬼疑道人嗟咨筆傳其奇或怪其形或奇于辭目爲怪魁是以贊之

金鄉薛少府廳畫鶴贊

李白

高堂閑軒兮雖聽訟而不擾圖蓬山之奇禽想瀛洲之縹緲紫頂煙施丹眸星皎昂然佇胎霍若驚矯形留座隅勢出天表謂長鳴於風宵終寂立於霜曉凝翫益古俯察逾妍舞疑傾市聽似聞弦儻感至精以神變或可弄景以浮煙

雙白鷹贊

并序

蘇頌

開元乙卯歲東夷君長白肅春扶夷國貢白鷹一雙其一重三斤有四兩其一重三斤有二兩皆皓如練色斑若綵章積雪全映飛花碎點所謂金氣之英瑤光之精高髻偉臆長距秀頸奮發而銳堅剛則厲摩天絕海雷擊颺逝觀其行時令順秋殺指麾應捷顧眄餘雄當落鵬之賞蔑仇鷄之敵實稀代之尤也皇

上祗膺聖圖欽若王道方寶賢重穀尊儒食艾後宮  
撤綺繡前殿焚珠玉與王侯卿士朝夕論思異無所  
貴輕衛公之好鶴奇無所珍同漢皇之卻馬畋豈務  
於馳騁獵以存乎蒐狩未嘗合圍掩羣載羽灑血乃  
強不攫而猛不噬矣然以萬方入貢懷其來也三年  
重譯嘉其至也故仁爲之心有仁則勇威爲之力有  
威則重況此鳥猛過於衆重倍於凡禮於君則勸忠  
祭於祖則立敬壯其體則用武絳其翼則成文彼寵  
而服之鵠也能果榮而戴之蟬也能絜矧乎職命司  
寇師惟尚文聞箴刺姦擇善爲吏蓋選士之是式匪

從禽之足云此謂備於圖而儆在位也微臣奉制敢  
稱贊曰

鷹之大者精明竦峻勁而橫絕雄則遠振錦文素綵  
珠聯玉潤往乃奮威將軍所徇鷹之次者勇銳光芒  
截海而至乘風載揚絡以紅點文其采章下韞必中  
惟吏之良

裴旻將軍射虎圖贊

并序

李翰

世稱裴將軍射虎而不及見駕部郎中兼侍御史榮  
陽鄭公博物好古旌能尚藝于裴氏子得其先人射  
虎圖傳以示予壯哉古今之未有倫也夫弧矢之用

所以服猛除暴而威戎狄故士生則以蓬矢射四方君立則以五侯選諸侯五侯之正皆飾以熊虎猛獸之皮象而射之也昭除暴不若也周官曰張五侯則遠國屬射而中之威不庭也昭昭乎除暴威遠之義蓋射之大端若殺不加有罪威不及不庭雖有百中之功而無一發之矢彀弓鳥下拾矢後號二則工矣是射之末節開元中山戎寇邊玄宗命將軍守北平州且充龍苑軍使以捍薊之北門公嘗率偏軍橫絕漠策匹馬陷重圍搖轆轤而百萬洞開驅橐駝而沙場一掃聲振北狄氣懾東胡稜威大矣而北平連山

廣野地實多虎擇肉於人如有飛翼荐食邊鄙甚於戎夷羣老憂而請焉公於是屏車徒去矛鏃曰賈予餘勇挺身以餌之眈眈虺虺烈烈騰逝當其威怒也百獸以伏萬夫莫亢而公馳單騎殼白羽挑之使來翼之而廻從容返視咫尺旋翫心即其度手張其機左射右拂縈之疊四中皆沒羽倒必應弦毛紛血灑腋洞心穿或叱之而弭伏或箠之而卻走將威有所勝氣有所全精專於中志王於內故能以一人之力戰羣虎之命使鋸牙鉤爪戢而莫措雷聲電視消而不揚猛摧於柔衆怯於獨其爲易也若獾狐兔聯鷺

鷓雖有矯牙冠羣亦垂頭搨尾應鏘而斃如此者凡三十有一矣其餘窳匿不敢復出大漠之南千里罷肩鳥獸咸若山川以寧胡人服藝畏威不敢南牧願充麾下者五百餘人茲所謂剛猛除暴而戎夷格昔漢飛將軍亦爲北平守擊胡有困辱之事射虎有騰傷之患其與將軍神勇非爲侔矣鄭公旣寫其圖俾予贊之詞曰

憬彼山戎噬我封略有羣者虎載肆騰搏邊畔慄慄若崩厥角將軍出塞屏出車騎進馬前當挺身以餌威有所服精有所聚氣全以雄力果而取震驚矍矍

虎反如鼠威武相相人反如虎勁弓雷霹長矢電激中口穿背貫心洞腋視如空皮劃若破的應發連斃紛紜枕藉據鞍遙叱揮箠逆擊閉目沈冥喪精僻易三軍駭呼萬靈動魄海波爲騰塞草皆赤卞莊俟鬪方聞兩獲漢將如飛幾爲所扼將軍神勇冠世超昔號後未工飲羽非敵弧矢之設以威四方羣虎旣夷狄人來降收闔罷局山川以寧至今北荒猶畏其靈

霹靂琴贊

并序

柳宗元

霹靂琴者零陵湘水西震餘枯桐之爲也始枯桐生石上說者言蛟龍伏其竅一夕暴震火之焚至旦乃

已其餘磴然倒臥道上震旁之民稍柴薪之超道人  
聞取以為三琴琴莫良于桐桐之良莫良于生石上  
石上之枯又加良焉火之餘又加良焉震之于火為  
異是琴也既良而異合為二美天下將不可載焉微  
道人天下之美幾喪余作贊辭識其越與左以著其  
事又益以序而為它傳辭曰

惟湘之涯惟石之危龍伏之靈震焚之奇既良而異  
爰合其美超實為之贊者柳子

琴贊

李白

嶧陽孤桐石聳天骨根老冰泉葉苦霜月斲為綠綺

微聲粲發秋風入松萬古奇絕

蒲津橋贊

張說

易曰利涉大川濟乎難也詩曰造舟為梁通乎險也  
域中有四瀆黃河居其長河上有三橋蒲津是其一  
隔秦稱塞臨晉名關關西之要衝河東之輻湊必由  
是也其舊制橫絕百丈連艦千艘辯脩竿以維之繫  
圍木以距之亦云固矣然每冬冰未合春沍初解流  
澌崢嶸塞川而下如礎如臼如堆如阜或挺或搵或  
磨或切綆斷航破無歲不有雖殘渭南之竹什隴坻  
之松敗輒更之罄不供費津吏成罪縣徒告勞以為

常矣開元有十二載皇帝聞之曰嘻我其慮哉乃思  
索其極敷祐于下通其變使人不倦相其宜授彼有  
司俾鐵代竹取堅易脆圖其始而可久紓其終而就  
逸無疆惟休亦無疆惟恤於是大匠歲事百工獻藝  
賦晉國之一鼓法周官之六齊飛廉煽炭祝融理爐  
是鍊是烹亦錯亦鍛結而爲連鎖鎔而爲伏牛偶立  
於兩岸襟束於中渾鎖以持航牛以繫纜亦將厭水  
物莫浮梁又䟽其舟間畫其鷁首必使奔斯不突積  
凌不隘新法旣成永代作則原夫天意有四旨焉濟  
人仁也利物義也順事禮也圖遠智也仁以平心義  
以和氣禮以成政智以節財心平則應諧百神矣氣  
和則感生萬物矣政成則又文之經矣財節則豐武  
之德矣故天將儲其禎地將阜其用人將盈其力聖  
皇之道乾乾翼翼觀藝而無窮誅功而無極

重校正唐文粹卷第二十四終



左米  
卷三十四

左三



重校正唐文粹卷第二十五

宋吳興姚 鉉纂  
明建武鄧 漢校

表奏書疏甲 摠一十三首

尊號二

請上尊號表 韓愈 賀冊尊號表

肆赦一

為桂州王珙中丞賀赦表 令狐楚

政事一

奉天論延訪朝臣表 陸贄

國立中央圖書館, NATIONAL CENTRAL LIBRARY, TAIWAN, R.O.C.

獻事五

為陳正卿進續尚書表 蕭頴士

進渾儀表 張詠

為東平薛太守進王氏瑞詩表 高適

進張巡中丞傳表 李翰

為并州長史張仁亶進九鼎銘表 吳少微

配祭一

論郊祭合設皇地祇表 賈魯

教化一

請行禮樂化導三事表 裴耀卿

請削爵一抑損外戚

為敬暉等論武氏宜削去王爵表 岑羲

請抑損外戚權寵并乞佐外郡表 武平一

請上尊號表

韓愈

臣某言臣得所管國子太學廣文四門及書筭律等七館學生沈周封等二百人狀稱身雖賤微然皆以選擇得備學生讀六藝之文修先王之道粗有知識皆由上恩天子整齊乾坤出入神聖經營乎無為之業游息乎混元之宮不謀於廷不戰於野坐收異部旋定幽都析木天街星宿清潤比嶽繫閭神鬼受職

地彌天區界軼海外舜之十有二州周之七百餘國  
章亥所步禹契所書四面輻湊各修貢職西戎之首  
北虜之渠怛威愧德失據狼狽收其種落逃遁遠去  
來獻羊馬千里不絕功旣如此德又如彼爰初嗣位  
首去姦孽隨所顧指應時清寧哀天下之鰥寡釋四  
海之鬱結左右前後莫匪俊良小大之材咸盡其用  
無所誅詰一和以仁由是五穀歲登百瑞時見六府  
三事惟序惟歌昔者媯皇殺黑龍以濟冀州堯誅九  
嬰以定下土血兵利刃僅就厥功以方吾君一何遠  
也堯之在位七十餘載戒飭咨嗟以致平治孔子之  
聖自云三年有成今自嗣位已來歲有餘耳臻此功  
德其何捷哉置郵傳命未足以諭以非常之功襲尋  
常之號以冠古之美屈守文之名臣子之誠闕而不  
奏天號人稱不滿事實斯亦搢紳先生之過也謂臣  
官居師長不言謂何考其所陳中於義理天人合願  
不謀而同非臣之愚所敢隱蔽輒冒死以聞伏乞天  
恩特允誠志令公卿大夫得竭思慮取正於經以定  
大號有司備禮擇日以頒天下幸甚天下幸甚

賀冊尊號表

臣某言伏聞宰相公卿百官及關輔百姓耆耄等以

陛下功崇德鉅天成地平宜加號於殊常以昭示於  
來載陳請懇至于再于三陛下仰稽乾符俯順人志  
乃以新秋首序令月吉辰發揚鴻休膺受顯冊天人  
合慶日月揚光環海之間含生之類誠歡誠喜頓首  
頓首臣聞體仁以長人之謂元發而中節之謂和無  
所不通之謂聖妙而無方之謂神經緯天地之謂文  
戡定禍亂之謂武先天不違之謂法天道濟天下之  
謂應道伏惟元和聖文神武法天應道皇帝陛下子  
育億兆視之如傷可謂體仁以長人矣喜怒以類刑  
賞不差可謂發而中節矣明照無私幽隱畢達可謂

無所不通矣發號出令雲行雨施可謂妙而無方矣  
三光順軌草木遂長可謂經緯天地矣除剗寇盜寓  
縣清夷可謂戡定禍亂矣風雨以時祥瑞輻湊可謂  
先天而天弗違矣國內無饑寒四夷皆朝貢可謂道  
濟天下矣衆美備具名實相當赫赫巍巍超今冠古  
方當議明堂辟雍之事撰泰山梁父之儀搜三代之  
逸禮補百王之漏典時乘六龍肆觀東后微臣幸生  
聖代觸犯刑章假息海隅死亡無日瞻望宸極心魂  
飛揚有未棄之悲無自新之望曾不得與鳥獸率舞  
蠻夷縱觀茹痛銜酸且愧且耻無任感恩戀闕懇迫

徬徨之至謹奉表陳賀以聞

爲桂州王珙中丞賀赦表

令狐楚

臣某言伏奉十一月十日制書南郊大禮畢大赦天下者湛恩流鴻大號渙汗際天接地孰不慶幸臣某中謝臣聞禘嘗之禮所以仁祖禘也郊社之儀所以尊天地也五帝之前賁桴土鼓致其敬敬有餘矣而禮不足三王已降金罍玉尊備其儀儀有餘矣而敬不聞秦之增封也覬望神仙漢之郊丘也穰除災害雖無文而成秩終有廢而莫舉猶可以編在方冊垂其鴻名豈若國家參文質于六經之中陛下酌損益

於百代之後順昊天而成命得黎人之懽心九穀有年四方無事然後因吉土迎長日咸池屢奏太蔟登歌萬靈識周旋之位百神知饗獻之節雲散而柴燔高達風清而蕭薌遠聞信大報之無私亦玄鑒之不昧臣當時集軍將官吏僧道百姓等丁寧宣示訖惟天之意莫遺於微細如日之輝不隔於幽遠頑豔知感鬼神懷柔何者刑莫大於成獄陛下捨之罪無輕重恩莫深於延賞陛下推之澤及存歿行道求志敢於直言者旣許以親覽觸綸罍網屏在遠方者又移之近郊減來歲之新租昭其儉也棄比年之逋債弘

諸仁也念勲臣而樹勲者益勸尊有德而不德者知  
慙賜羸老有粟帛之優禮神祇無牲幣之愛此所謂  
幽室盡曉枯條徧春雷雨作而蟄蟲昭蘇風雲行而  
籠鳥飛舞率土臣妾不勝大慶況臣蒙被恩澤獲齒  
生類會守遠郡阻窺盛禮徘徊天外日與心斷無任  
并躍之至謹遣突將王清朝等奉表陳賀以聞

奉天論延訪朝臣表

陸贄

臣某言賊泚逋誅尚穴宮禁陛下思戀宗廟痛傷黎  
元仁孝交感至於憤激猥以急務下詢微臣臣雖鄙  
儒尊慕行義荷陛下知已之遇感陛下思理之誠愚

衷所懷承問輒發不以淺深自揆不以喜怒上虞誠  
缺於周防承順之規是亦忠於陛下至之分也前  
奉詔問尋具上陳請延羣臣稍與親接廣咨訪之路  
開諫諍之門通壅鬱之情弘採拔之道自獻荅奏迨  
茲彌旬不聞施行不賜訓詰未審宸旨以爲如何如  
昧於忖量但務竭盡恐由辭理蹇拙不能暢達事情  
悽悽血誠復願披瀝頻煩黷冒豈不慙惶蓋犬馬感  
恩思效之心睽睽而不能自止者也臣聞立國之本  
在乎得衆得衆之要在乎見情故仲尼以爲人情者  
聖王之田理道所由生也是則時之否泰事之損益

萬化所繫必因人情情有通塞故否泰生情有厚薄故損益生通天下之情者莫智於聖人盡聖人之心者莫測於易象其列卦也乾下坤上乃爲泰乾上坤下則曰否其取象也損上益下則曰益損下益上乃爲損乾爲天爲君坤爲地爲臣天在下而地處上於位垂矣而反謂之泰者上下交故也君在上而臣處下於義順也而反謂之否者上下不交故也氣不交則庶物不育情不交則萬邦不和天氣下降地氣上騰然後歲功成君澤下流臣誠上達然後理道立損益之義亦由是焉上約已而裕於人人必悅而奉上矣其不謂之益乎上蔑人而肆於己人必怨而叛上矣其不謂之損乎然則上下交而泰不交而否自損者人益自益者人損情之得失豈容易哉故喻君爲舟喻人爲水言水能載舟亦能覆舟也舟即君道水即人情舟順水之道乃浮違則沒君得人之情乃固失則危是以古先聖王居人之上也必以其心從天下之心而不敢以天下之人從其欲乃至兢兢業業一日萬幾夫幾者事之微也以聖人之德天子之尊且猶慎事之微乃至一日萬慮豈不以居上接下懼失其情歟書曰人心唯危道心唯微微則萬幾之慮

不得不精也危則覆舟之誠不可不畏也夫揆物以  
意宣意以言言或是非莫若考於有跡跡或成敗莫  
若驗於已行自昔王業盛衰君道得失史冊盡在粲  
然可徵與衆同欲靡不興違衆自用靡不廢從善納  
諫靡不固遠賢耻過靡不危故詩書稱堯之德則曰  
稽于衆捨已從人數舜之功則曰明四目達四聰言  
務同欲也序禹之所由興則曰益贊于禹禹拜昌言  
述湯之所以王則曰用人惟已改過不吝言能納諫  
也歌文王作周則曰濟濟多士文王以寧美武王克  
殷則曰亂臣十人同心同德言皆從善也堯舜禹湯

文武此六君子天下之盛王也莫不從諫而輔德詢  
衆以成功是則德益盛而慮益微功愈高而意愈下  
及代之衰也則道亦反焉故書曰紂有億兆夷人離  
心離德言違衆也詩曰汝包魚休于中國歛怨以爲德  
不明爾德時無背無側爾德不明以無背無卿又曰  
雖無老成人尚有典刑曾是莫聽大命以傾言遠賢  
也書曰謂人莫已若者亡詩曰惟彼不慎自獨俾臧  
自有肺腸俾人卒狂言自用也前史數桀紂之惡曰  
智足以拒諫言足以飾非言耻過也考得失於已行  
之跡鑑盛衰於已驗之符孰失道而不衰孰得理而



不盛相應以類影響不差胡不則而象之敬而畏之乎自秦漢暨于周隋其間將歷千載代興者非一姓繼覆者非一君雖所遇殊時所爲異跡然失衆必敗得衆必成與堯舜禹湯同務者必興與桀紂幽厲同趣者必覆多同於善則功倍多同於惡則禍甚善惡同類端如貫珠成敗象行明若觀火此歷代之元龜也尚恐議者曰時異事殊臣請復爲陛下粗舉近效之尤章者以辯焉太宗文皇帝以天縱之才有神器之重武定禍亂文致太平威行如雷霆明照俾日月英略施於百姓聖功被於九歌固非庶品之所度量

常情之所鑷仰然猶兢兢畏慎懼失人心每戒臣下獻規恒以危亡爲慮夙興聽理日旰勞公卿迭進廷奏庶務評議得失與衆共之下無滯情上無私斷退朝之暇宴接待臣咨訪謀猷詢求過闕或論往古成敗或問人間事情每言及暗主亂朝則省懼自戒言及賢君理代則企竦思齊言及稼穡艱難則上下相匡務遵勤儉言及閭閻疾苦則君臣同慮議息征徭懋德懲違觸類滋長尚恐過言謬舉既往難追每召宰輔平章必遣諫官俱入小有頗失隨即箴規得一善必遽命甄昇聽一諫必明加褒錫故得時無闕

事人樂輸誠又引文學之流更直宿於內署或講求典禮或諷誦詩書每至夜分情忘厭倦伏以太宗之德美貞觀之理安且猶務得人心其勤若此是則人之於理道可一日不接乎高宗初年亦親聽納故當時翕然歸美以爲有貞觀之風兼賴遺澤在人先範垂裕幸無改作俗以阜康數十年閒天下無事承平之業滋久倦怠之意頗彰燕居益深接下彌簡前哲之耿光甯遠中宮之威柄潛移卒有嗣聖臨朝天后革命豈不以經邦之道闕疇咨於大猷宴安之懷溺偏信於近狎馴致禍變幾將傾危雖亂匪自他然其

失一也弊俗一靡餘風遂流訖神龍景雲之間皆倖倖亂朝忠義不達玄宗躬定大難手振宏綱開懷納忠克已從諫專用舊老廣採羣才大臣不敢壅下情私服不敢干公議朝清道泰垂三十年謂化已成謂安可保耳目之娛漸廣憂勤之志稍衰侈心一萌邪道並進貪穢竊柄者則曰德如堯舜矣焉用勞神承意趣利者則曰時已太平矣胡不爲樂有深謀遠慮者謂之迂誕驚衆有謹言切議者謂之誹謗邀名至尊收視於穆清上宰養威於廊廟諫曹以頌義爲奉職法吏以識旨爲當官司府以厚斂爲公忠權門以